









圓瑛法師著

勸脩念佛法門

佛陀教育基金會 印贈

一切佛經，及闡揚佛法諸書，無不令人趨吉避凶，改過遷善。明三世之因果，識本具之佛性。出生死之苦海，生極樂之蓮邦。讀者必須生感恩心，作難遭想。淨手潔案，主敬存誠。如面佛天，如臨師保。則無邊利益，自可親得。若肆無忌憚，任意褻瀆。及固執管見，妄生毀謗，則罪過彌天，苦報無盡。奉勸世人，當遠罪求益，離苦得樂也。

# 序

淨土法門。普被三根。實如來上成佛道。下化衆生。成始成終之妙道。彌陀誓願。九界齊資。乃衆生速出苦海。頓預蓮池。心作心是之良謨。此之一法。爲一代時教中。仗佛力之特別法門。不可與一切大小權實。仗自力之諸法門同論者。世多不察。稍聰明者。多矜己之智力。不肯修持。且藐視修持之人。鄙之爲愚夫愚婦。若將浼焉。是讓此卽生了生脫死。超凡入聖之大利益。於愚夫愚婦。而自己不願得之。可不哀哉。不知淨土法門。其大無外。爲一切法門之發源歸宿法門。是故一切法門。無不從此法界流。無不還歸此法界也。果已三惑淨盡。四德圓證。不修亦可。若尙未至此地位。且請隨華藏海衆。十住。十行。十迴向。十地。等覺菩薩之班。一致進行。以十大願王之不思議功德。迴向往生西方極樂世界。以期速圓佛果。能如是者。可謂大智慧大丈夫。世出世間之能事畢矣。尙須隨類現身。弘揚此法。作證佛果後之觀音普賢。以期衆

生。咸成佛道而後已。光宿業深重。雖則五十餘年。虛預僧倫。一切諸法。皆無所知。雖常念佛。以業重故。其心與佛。未能相應。然信佛無虛願。當不棄我。故其志願。任誰莫轉。光近圓瑛法師。講演羣經之暇。著勸修念佛法門之論。將欲流通。函命作序。光老矣。目力精神。均不給。久已謝絕筆墨差事。今幸念佛一法。得人提倡。遂攝舉大意。以塞其責云。

古吳靈巖山釋印光撰

年七十八



## 圓瑛法師法彙序

圓瑛上人。吾閩產也。幼失怙恃。依季父教養。穎悟絕人。甫成年。卽受牒度於石鼓山之湧泉寺。早參三昧。夙擅說經。素以宏化利生爲本願。初主甯波接待寺。倡辦甯波佛教孤兒院。次至泉州重興開元寺。創辦開元慈兒院。孤露子弟。薰育者衆。旋歷內地。並南洋羣島。周流說法。於大乘教義。多所闡明。生平著作。編成法彙。近被推爲甯波天童七塔二大叢林及中國佛教會首席。去年天童寺不戒于火。上人則奔走四方。募化重修。規模闋敝。爲四明道場之冠。間亦稍治生產。爲發展化育基金。是皆躬行實踐。以求達其利濟宏願。固不僅以舌粲蓮花見稱也。今秋上人蒞京說法。持示所講仁王護國般若波羅密經講義。其所發揮演繹。皆切於護國愛人。旨趣之宏。足維風化。爰樂而爲之序。

閩侯林 森

## 圓瑛法彙序

閩中山川磅礴。靈氣所鍾。高僧輩出。黃蘗心要。百丈清規。古德流風。至今猶有存者。圓瑛法師。籍隸古田。蚤歲脫俗。眞參實學。孜孜弗懈。卒能成就其德業。光明俊偉。與先哲同揆。鄉人士皈依座下者。如水趨壑。比歲卓錫浙東。先後住持七塔天童二寺。法雨覃敷。三根普被。余今夏曾詣天童。參承道席。是時方演講楞嚴。緇素翕集。法師闡明義趣。機辯縱橫。聽者無不悅服。又以持戒爲學佛之要。每反復誥誡而巳。信乎宗說兼通。行解相應。足爲學者之楷模也。今海上佛學書局。以法師平生撰著。彙刻行世。徵序於余。夫我佛設教。法門雖廣。無非使人解黏脫縛。明心見性而已。學道之士。眞積力久。有悟於第一義諦。靈光獨耀。迴脫根塵。雖不立文字可也。其或明宗弘教。發爲文辭。等身著作亦可也。何以故。此心既空。則文字與實相。不相違異。故法師願力宏毅。所至修廢舉墜。鉅細靡遺。至於挺身衛道。處事變艱危之會。不怵不

撓。尤爲難能可貴。惟其真理既徹。應物無方。雖熾然有爲。而不著有爲之相。故觀法師之文。卽事卽理。圓融無礙。而佛法之體用彰明。具可於言外得之。嗚呼。魔說害教。魚目混珍。大法之陵夷甚矣。有如法師言。句引經據論。涵義深廣。而歸於平實。是能燦真燈於既昏。續慧命於將墜者。余安得不爲之往復讚嘆也哉。

閩侯林翔敬撰

# 勸修念佛法門

總目分爲十二

第一念佛發起因緣

第二念佛卽是修行

第三念佛最爲穩當

第四念佛有勝方便

第五念佛能消業障

第六念佛莫求福報

第七念佛能斷煩惱

第八念佛速了生死

第九念佛具足三學

• 第十念佛普攝羣機

十一念佛可度衆生

十二念佛得成佛道

# 勸修念佛法門

福建鼓山湧泉禪寺沙門圓瑛宏悟述

## 正念佛發起因緣第一

蓮池大師云。一越三祇於一念。齊諸聖於片言。至哉妙用不可得而思議者。其唯佛說阿彌陀經歟。一此經爲持名念佛法門發起之因緣也。我佛釋迦牟尼。觀見衆生。本來是佛。個個具有佛之知見。奈爲無明所覆。妄想所蔽。不自覺知。雖然不覺。而本具佛性。依然存在。如寶藏埋於宅中。明珠繫乎衣裏。不曾喪失。故我佛開示念佛法門。欲令衆生發心念佛。而悟入本具佛之知見也。

諸佛世尊。無非爲一大事因緣故。出現於世。法華經。佛告舍利弗云。一舍利弗。云何名爲諸佛世尊。唯以一大事因緣故。出現於世。諸佛世尊。欲令衆生開佛知見。使得清淨。故出現於世。欲示衆生佛之知見。故出現於世。欲令衆

生。悟佛知見。故出現於世。欲令衆生入佛知見道。故出現於世。一佛之知見。即諸佛之四智菩提。亦即衆生之三德祕藏。諸佛悟之而成等正覺。衆生迷之。則枉受輪迴。當知迷悟雖殊。生佛本來平等。金剛經云。一是法平等。無有高下。一即指衆生本具之佛知佛見。與諸如來無二無別也。

知見二字。約根性說。根性即是佛性。此性常在六根門頭。放光動地。在眼曰見。在耳曰聞。在鼻曰嗅。在舌曰嘗。在身曰覺。在意曰知。今但舉意根與眼根。故曰知見。實則六性唯是一性。如楞嚴經云。原以一精明。分成六和合。佛知真知。無所不知。佛見真見。無所不見。今在衆生分上。被妄想執著所誤。則成爲妄知妄見。誠如古德所云。一片白雲橫谷口。幾多歸鳥盡迷巢。一當知妄無自性。全體即真。是以佛爲衆生開之示之。欲令衆生悟之入之。如指宅中寶藏。乃是本有家珍。衣裏明珠。當下不求自得。

我釋迦世尊。開示衆生念佛法門。即是欲令衆生都攝六根。淨念相繼。稱念

彌陀名號。念到境寂心空。佛性自當顯現。卽能悟入佛之知見。遂得親見自性彌陀。而完此一段出世大因緣也。

念佛法門。又稱淨土法門。又名蓮宗。又曰淨宗。乃是釋迦如來。至極悲心。觀機施教。觀察衆生之機。唯此持名念佛一法。最易得度。故無問自說。說出一卷佛說阿彌陀經。不假他人發起。卽自告舍利弗。一從是西方過十萬億佛土。有世界名曰極樂。其土有佛號阿彌陀。今現在說法。一自唱極樂依報。彌陀正報。二種名字。此萬世持名念佛。從出之大原。乃金口所親宣之妙法也。三根普被。六趣咸超。其利益有不可思議者焉。

彌陀經中。佛自解釋極樂名字云。一舍利弗。彼土何故名爲極樂。其國衆生。無有衆苦。但受諸樂。故名極樂。一於是廣陳西方依正二報。種種莊嚴。發起衆生之信仰。次則普勸衆生。志求往生。人人應當發願。經云。一舍利弗。衆生聞者。應當發願。願生彼國。所以者何。得與如是諸上善人。俱會一處。一後則

極勸執持名號。一心不亂。而立念佛之淨行。經云：「舍利弗，若有善男子善女人，聞說阿彌陀佛，執持名號。若一日，若二日，若三日，若四日，若五日，若六日，若七日，一心不亂。其人臨命終時，阿彌陀佛與諸聖衆，現在其前。是人終時，心不顛倒，即得往生阿彌陀佛極樂國土。」

如上所引彌陀經之正宗，乃佛所說勸信勸願勸行之文。我佛以信願行三者，以爲往生淨土三種資糧。果能具足三資，必定誕登九品。要知往生與否，全由信願之有無。品位高下，乃在行持之深淺。信願行三者，如鼎三足，闕一不可。我常勸人修持淨土法門，於此三資之上，各加一字，謂信，必定要深信。願，必定要切願。行，必定要實行。果能如是，則往生淨土，可操左券而得矣。

一深信者，略分四種。一信釋迦如來。二覺圓滿。四智洞明。觀機施教。說此念佛法門。決定是對機之教。不會說錯的。二信西方極樂世界。由彌陀如來因地悲心所發宏願。願後勤修萬行。功德莊嚴之所成就。決定有此極樂淨



土不是想像的。三信六方諸佛。各出廣長舌相。讚歎淨土法門。是不可思議功德。歷代賢聖。宏揚淨土法門。爲修行徑中捷徑。至若千經萬論處處指陳。古聖先賢。人人提倡。決定是真實之語。不是騙人的。四信娑婆濁惡。爲衆生惡業之所招感。極樂清淨。爲衆生淨業之所成就。念佛。可以清淨身口。意三業。淨業既成。淨土往生。決定是因果相孚。不是虛誑的。果然具此四種信心。縱使有人說。更有法門。超過念佛。勸我信仰。我終不爲所轉。仍是相信念佛法門。最爲第一。如是乃名深信。

二切願者。略分四種。一願不負己靈。己靈卽自己本具靈覺之性。此性爲天然之佛性。一切衆生。人人皆具。奈爲煩惱所誤。結業所纏。輪迴生死苦海之中。今生何幸。得生人道。得聞彌陀名號。本願功德。深生信仰。自應發願。盡此報身。受持念佛法門。求脫生死。求生淨土。求成佛道。不致辜負己靈也。二願離苦得樂。我等隨業受報。生在娑婆。五濁惡世。備嬰衆苦。三苦、八苦、無

量諸苦。說不能盡。今以娑婆極樂。兩土對比。忻厭自生。娑婆有三苦。一苦苦。五趣衆生。既受生死之身。已經是苦。更加衆苦逼迫。故曰苦苦。二壞苦。六欲天至三禪天。雖然受樂。樂不久長。終有敗壞。故曰壞苦。三行苦。四禪天以上。雖然苦樂雙亡。難免行陰遷流。未離生死。天報盡時。還要下墮。故曰行苦。而極樂衆生。但受身心安泰之樂。而無苦苦。但受依正莊嚴之樂。而無壞苦。但受三昧寂定之樂。而無行苦。

又娑婆有八苦。一生苦。二老苦。三病苦。四死苦。五愛別離苦。六冤憎會苦。七求不得苦。八煩惱熾盛苦。而極樂衆生。有蓮華化生之樂。而無胎獄生苦。有相好光明之樂。而無衰變老苦。有自在安寧之樂。而無痛癢病苦。有壽命無量之樂。而無四大分離。數數死苦。有海會相聚之樂。而無愛別離苦。有上善俱會之樂。而無冤憎會苦。有所欲如意之樂。而無求不得苦。有五蘊皆空之樂。而無煩惱熾盛苦。兩土穢淨。苦樂懸殊。故切願往生。離苦得樂也。

三願速登不退。此土修行難進而易退。都爲環境惡劣。障道緣多。助道緣少。或始勤而終怠。或改途而易轍。或功行未成。世緣已盡。捨生易報。頓忘前修。不能繼續。來生作業。必當退墮。此土修行之難。如十信位菩薩。雖發大心。旋進旋退。如空中毛。隨風而轉。修行信心。須經一萬劫。信心滿足。善根成熟。方登初住。得位不退。而念佛法門。但得往生。便可圓證三不退。（位不退、行不退、念不退）彌陀經云。一衆生生者。皆是阿鞞跋致。（譯云不退地）故決定求生淨土。願登不退也。

四願親見彌陀。因諸佛出世。難得值遇。譬如優曇華。時時乃一現耳。古人云。一佛在世時。我沉淪。我得人身。佛滅度。翻悔此身多業障。不見如來金色身。一汝我生當末世。釋迦已過。彌勒未生。欲見佛身。親聞佛法。甚爲難事。譬如孤兒。無怙無恃。殊可憐憫。既失乳養。又乏提攜。危殆孰甚。今極樂世界。彌陀慈尊。現在說法。憐念衆生。如母憶子。故決定念佛。求生淨土。願見彌陀。縱然

劫石可磨。而我此願不易。即使臨命終時。或帝釋天主。接我上生忉利天。或大梵天王。接我上生初禪天。我亦決定不去。何況餘趣。又不僅願生西方。還要願生上品上生。誓取金臺。早得見佛。速證無生法忍。如懷玉大師。精修淨業。一日見彌陀現身。天樂鳴空。手執銀臺來迎。玉心念。我一生精進。志在金臺。今只銀臺。則不肯往。佛亦不强。遂轉身西去。玉由是益加精進。自知必得往生。二十一日後。再見佛菩薩。徧滿虛空。彌陀手執金臺重來接引。玉曰。吾願足矣。遂合掌念佛西逝。是時空中如百千種樂。同時俱作。太守頌曰。一我師一念登初地。佛國笙歌兩度來。惟有門前古槐樹。枝低只爲罍金臺。一正如二祖光明善導大師所云。一如汝所念。遂汝所願。一是也。

願之爲力也。大不可思議。西方極樂世界。種種莊嚴。全由彌陀願力所成。倘念佛有信無願。則信爲虛信。故次當發願。普賢行願品。以十大願王。導歸極樂。又普賢菩薩發願偈云。一願我臨欲命終時。盡除一切諸障礙。面見彼佛。

阿彌陀。卽得往生安樂刹。一凡修持淨土者。其願不可不切也。

三實行者。行卽執持名號。專修淨土之行。其行貴在真實。若雖有信願。而無實行。則極樂淨土。仍不得生。如世間果種。雖信此種種之必能結果。亦願得果。倘不種植。不灌溉培養。其果終不可得。念佛。信願行三者。闕一不可。亦復如是。然念佛之行有二。

一事行。以能念之心。念所念之佛。能所分明。心佛相應。心不離佛。佛不離心。念茲在茲。無有間斷。行住坐臥。不離一句佛號。不起一切妄想。心似寒潭止水。佛如秋月映現。湛然不動。是爲事行念佛。三昧功成。

二理行。卽明中道之理。而修念佛之行。聞說念佛法門。諦信不疑。願生極樂。專修淨業。不住有念。不落無念。一心體究。能念心外。無有佛爲我所念。所念佛外。無有心能念於佛。能所不立。心佛一如。心卽是佛。佛卽是心。無有二相。亦不可以有無求。若言其有。則能念之心。體本空寂。所念之佛。相不可得。若

言其無則能念之心。靈靈不昧。所念之佛。歷歷分明。有無相泯。而歸實相。古德偈云。一忽然起念念彌陀。平地無風自作波。念念消歸無念處。豈知無念亦爲多。一此皆不專修事相。而純修理觀。觀力成就了。知心佛雖有二名。心佛本來一體。親見自性彌陀。一心湛寂。是爲理行念佛。三昧功成。信願行三者。爲往生淨土資糧。資糧既備。往生何難。既生淨土。便超三界。便離生死。故釋迦如來。無問自說。以爲念佛發起之因緣也。

### 己念佛卽是修行第二

大凡人之修行。與不修行。就在身口意三業分別。若身行惡事。口說惡言。意起惡念。卽是不修行。而念佛法門。能令衆生三業清淨。卽是修行之法。今試驗之。有一衆生。聞此念佛法門。深信不疑。願生淨土。實行念佛。一心專念彌陀名號。字字從心生起。字字從口念出。字字從耳聽入。念得分分明明。一句如是。句句如是。口念心念。心口如一。念念相續。無有間斷。心中唯有佛。佛外

更無心。以此念佛一念。而除一切妄念。妄念既止。則意業清淨。此卽是意業修行。口念佛號。不說閒言。古人云。一少說一句話。多念幾聲佛。一聲聲不離佛號。則口業清淨。此卽是口業修行。衆生身業。都爲意業所驅使。意業不起念。身業無所行。念佛之人。一心念佛。六根都攝。則身業清淨。此卽是身業修行。如何說念佛不是修行之法。如上所舉念佛。能令三業清淨。可爲修行之明證矣。

或謂一念佛。可以往生極樂世界。乃是欺騙愚夫愚婦之言。如果要離苦惱世界。得到安樂處所。必定要有很難得。很奇妙之法。修之纔是。今但念佛名。何得謂爲真實修行。此等說話。實在最足誤人。奉勸大家。當加審察。不可聽信。要知念佛法門。非是他人所說。乃是釋迦如來。至極悲心。觀機施教。無問自說。佛爲萬德至尊。言無虛妄。豈有欺騙衆生耶。

佛觀衆生。妄念紛紛。無由止息。故教人專念阿彌陀佛名號。是爲以念止念。

之法。猶如醫師。以毒攻毒。又衆生之心。如水本來清淨。而起種種妄念。如以塵土灰沙。投於水中。清水竟然變成濁水。今欲澄濁就清。必假清水珠之功。方能有效。一句佛號。如清水珠。衆生亂心如濁水。雲棲大師云。一清珠投於濁水。濁水不得不清。佛號納於亂心。亂心不得不佛。一念佛正是教人成佛之法。豈是騙人乎。

衆生每日二六時中。意識念念攀緣六塵境界。隨塵取著。妄生貪求。造種種業。依業受報。輪轉生死。長劫不休。意識有二部分。一分名獨頭意識。內緣獨影境。此境即是前五塵。色、聲、香、味、觸。之落卸影子。落在意地之中。爲他所緣。一分名同時意識。同前眼、耳、鼻、舌、身五識。俱時而起。緣外五塵境界。如眼根見色塵時。眼識卽起。意識與他同時而起。同緣色塵。吸取色塵境界。交與獨頭意識。計度分別。喻如攝影鏡相似。眼根如是。乃至身根對觸塵。身識起時。意識與他同時而起。同緣觸塵。亦復如是。



意識念念分別。六塵境界。起惑做業。卽是生死根源。我佛教人修持念佛法門。念念專注彌陀聖號。自然不念六塵境界。不生分別之心。此卽是拔本塞源唯一妙法。如眼見色時。但念阿彌陀佛。不念色塵好醜。諸根對境。悉皆如是。卽大勢至菩薩所說。一都攝六根。淨念相繼。入三摩提。斯爲第一。一如何不是修行之法。

或以持念佛名無功。殊不知佛名具足萬德。持之可以攝心。修行之法。無過於斯。蓮池大師云。一舉其名兮。兼衆德而俱備。專乎持也。統百行以無遺。一豈可謂之無功哉。昔日周利槃特迦發心出家。學習一偈。於一百日。得前遺後。得後遺前。不能成誦。偈曰。一守口攝意身莫犯。莫惱一切諸有情。無益之苦當遠離。如是行者得度世。一此偈是佛勅令弟子。每日早中晚三時。三摩頭。三誦偈。不忘我已出家。定要依偈修行。槃特久學不會。其兄周利。乃令還俗。槃特記力雖闕。道心頗堅。不肯還俗。佛愍其愚。教修數息觀。乃數鼻中出

入氣息。從一數至十。至十爲止。從一再數。數入不數出。數出不數入。不能出入。雙數。槃特依教安居修習。微細窮盡息相。生住異滅。四相遷流。諸行剎那。其心豁然。得大無礙。盡諸有漏。得阿羅漢果。鼻息當然不及佛名。數息尙能證果。何況念佛。能使三業清淨。能脫六道輪迴。豈可謂不是修行耶。

卍念佛最爲穩當第三

釋迦如來說法四十九年。因機施教。廣立行門。綜計有八萬四千法門。門門皆可入道。譬如千徑九達。皆達王城。楞嚴所謂。一歸元無二路。方便有多門。一也。然於諸門之中。求其最易修。最穩當者。莫若念佛一法。但念南無阿彌陀佛。六字洪名。無論何人。一教便會。只要口念心念。念念相續。便可得成念佛三昧。其易修可知矣。若但易修而無功效。固亦不足貴。而此念佛法門。但能發起深信之心。切願求生。實行念去。卽不參究。不觀想。亦得往生。若依其他法門修習。但憑自己之力。倘自力不足。或錯入歧路。或中途成魔。或功行

未成。世緣已畢。來生不能繼續修持。則前功盡廢。此皆危殆之事。

惟有念佛法門。而有自他二力可恃。自力。卽自己一心念佛之心力。他力。卽阿彌陀佛。因地所發。四十八願之願力。自力之外。更加他力。但肯老實念佛。無不往生淨土。祇要抱定一句佛號。一生持念到底。常爲諸佛之所護念。常爲佛光之所照觸。一心求生淨土。自不至錯入歧路。亦不會中途成魔。以及隔生遺忘之危殆。

念佛衆生。臨命終時。阿彌陀佛。因中發願。現身接引。此卽會二力於一時。收成功於一念。決定親見佛身。往生極樂。於彈指頃。業卸娑婆。神遊淨土。橫超三界苦海。託質九品蓮臺。位居不退地。果證無生忍。故古德云。一修行以念佛爲穩當。一誠哉是言也。

現在世人。羣推禪宗。爲最上乘。乃是頓教法門。可以頓出生死。頓超佛地。斯言亦復不謬。然須有上根利智之機。方可一生事辦。倘屬下根。自是完全絕。

分。即使中根。亦未必一生能了。隔世多昧。前修到底總不穩當。如宋朝青草堂。爲禪門宗匠。一生精進。晚年見宰相告老還鄉。十分榮耀。忽動一念羨慕之心。身後竟生曾氏爲子。年少登科。官至宰相。以前生之禪業。換一世之功名。豈不惜乎。宰相身後。升沉莫卜。羅狀元云。一家飽煖千家怨。半世功名百世冤。一而念佛之人。但得信願行。三資糧具足。臨終自然蒙佛接引。往生極樂淨土。永卸輪迴。而得解脫。極樂國中。蓮華化生。是爲最後之生。壽命無量。與諸上善人。俱會一處。任運進修。自可一生成佛。直趣無上菩提。修行法門之穩當。孰有過於此者乎。

#### 卅念佛有勝方便第四

我佛所說。無量行門。皆是隨機方便。利益一切衆生。而求其於方便之中。殊勝方便者。則莫如持名念佛一法也。今略舉其殊勝之點如下。

念佛第一殊勝方便。卽是可以普攝羣機。若智若愚皆有分。是僧是俗總堪

修。人不分男女貴賤。處不論寺廟俗家。時不拘閒忙動靜。但肯一心念佛。無論何人。皆得往生。疾超生死。永息輪迴。其殊勝爲何如也。

或謂念佛。乃愚夫愚婦所修。而智識階級。何必修此法門。試問。今之智人。能超過文殊普賢。二大士否。彼皆發願。求生淨土。普賢偈云。一願我臨欲命終時。盡除一切諸障礙。面見彼佛阿彌陀。卽得往生安樂刹。一文殊偈全同。一願我命終時。滅除諸障礙。面見阿彌陀。往生安樂刹。一又能超過永明蓮池。二大師否。彼二師智海弘深。才華煥發。爲古今所共仰。皆是專心念佛。力宏淨土法門。著述豐富。並行於世。我何人斯。而說何必念佛。卽如諺云。聰明多被聰明誤。卽此輩也。

或謂念佛。是出家人之事。在家人不必念佛。此言不但辜負佛懷。而且貽誤衆生。諸佛說法。無非普度衆生。說此念佛法門。三根普利。九有咸超。正是普度衆生之法。豈有只度出家人。不度在家人之理。既是普度。何分僧俗。故無

論男女老壯。皆應發心念佛。方能得度。試觀淨土往生集。有多少在家人。一生念佛。臨終現瑞。往生西方極樂國土。

或謂念佛。要到寺廟裏去念。要在佛堂裏面念。俗家別處。則不可念。此種之人。亦是不懂念佛道理。當知念佛。則行住坐臥。二六時中。除大小便外。無一時一處。不可念佛。正要念念相續。方能把念佛工夫。念得純熟。打成一片。最好在睡夢中。都要記得念佛。果能如是。則臨命終時。方有把握。不至顛倒。古詩云。一行時正好念彌陀。一步還隨一佛過。足下時時遊淨土。心頭念念離娑婆。傍華隨柳須回顧。臨山登水莫放他。等得阿儂生極樂。十方來去任如何。——住時念佛好觀身。四大之中那一真。我與彌陀非兩個。影兼明月恰三人。空房漸朽應難住。淨土雖遙尙易生。何日如蟬新脫殼。蓮華胎裏產金身。——坐時觀佛足跏趺。身在蓮臺華正敷。毫相分明隨念見。金容映現與心符。事如夢幻元空寂。理到圓融非有無。何日池頭捧雙足。親蒙頂上灌醍

酬。一臥時念佛莫開聲。鼻息之中好繫名。一枕清風秋萬里。半床明月夜三更。無如塵累心難斷。惟有蓮華夢易成。睡眠朦朧諸佛現。覺來追記尙分明。一如睡夢中不能念佛。都是工夫未純。醒時當向佛前叩頭流血。生大慚愧。更加精進。念到二三十年。自然於大昏睡中念佛亦不間斷矣。須知人生如醒人死如夢。夢中常常能夠念佛。死時自能念佛往生。又念佛工夫。須要自已勘驗。果能於歡喜煩惱。順逆境中。依舊念念不斷。不爲愛憎之境所動。則生死關頭。自得一心不亂矣。

或謂念佛是老年人之事。年輕者不必念佛。此亦是誤人之言。當知人命無常。壽夭不定。發心念佛。愈早愈好。果然長壽。則念佛多年。功行深。而品位必高。古人云。一莫待老年方學道。孤墳多是少年人。一請味斯言。自當猛省。如能及早念佛。即使定業難逃。短命而死。則淨業已修。淨緣已結。雖功行尙淺。而信願深切。亦可蒙佛接引。往生極樂。余有勸修詩句云。一奉勸諸賢及早

修。光陰似箭去難留。寒來暑往催人老。不覺青年白了頭。一

有說念佛是閒人的事。有公務工作之人。不能念佛。豈不聞白樂天居士云。一行也阿彌陀。坐也阿彌陀。縱饒忙似箭。不廢阿彌陀。一昔日葛濟之之妻。家貧織布度日。有僧教以念佛法門。終日持念不輟。在布機上。擲一梭念一聲佛。號習以爲常。雖終日織布。不知辛苦。其夫素習道家鉛汞之術。勸妻捨念佛。而煉丹藥。其妻不從。仍織布念佛如故。一日正在織布念佛之時。彌陀現身於虛空中。光明照耀。氏在機杼見之。急起下拜。卽邀濟之瞻禮。濟之亦見佛半身。遂生信仰。念佛見佛。果有其事。則臨命終時。蒙佛接引。當亦不謬。乃焚仙經。同修淨土。後夫婦臨終。俱得瑞相。同生極樂。此念佛不礙作事之明證也。何必一定閒人。方可念佛。

念佛第二殊勝方便。卽是可以帶業往生。一切衆生。依惑造業。隨業受報。此乃必然之事。地藏經云。一業力甚大。能敵須彌。能深巨海。能障聖道。是故衆



生莫輕小惡。以爲無罪。死後有報。纖毫受之。父子至親。歧路各別。縱然相遇。無肯代受。一若業不空。生死必定不了。如安世高法師。累世修持。有一世爲安息國太子。捨離五欲。出家修道。得宿命通。知前世欠人命債。其債主在中國。於是航海而來。到達洛陽。行至曠野無人之境。忽覩而來一少年。身佩鋼刀。遠見法師。則怒氣冲冲。近前未發一言。乃拔刀殺之。法師死後。靈魂卽至安息國投胎。又爲太子。迨至年長。又發心出家。依然有宿命通。知前世至洛陽。酬還命債。今尙有命債未清。債主亦在洛陽。於是重來。至前生殺彼之人家中借宿。其人卽允。何以前則殺彼身命。今乃允其借宿。因命債已還故也。乃款待晚餐。僧問曰。汝認識我否。答曰不識。又告曰。我卽爲汝於某年某月某日。在某曠野中所殺之僧是也。其人乃大驚。以爲此事。無有第三者能知。此僧必是鬼來索命也。遂欲逃遁。僧對曰。勿懼。我非鬼也。卽告以被殺之後。其魂復至安息投胎。此次重來洛陽。仍欲償還命債。我明日當被人打死。以

償夙生命債。故特來相求。請汝明日爲我作證。傳我遺囑。說是我應還他命債。請官廳不必治誤殺者之罪。託畢各自安睡。次日同至街坊。僧前行。其人隨後。見僧之前。有一鄉人挑柴。前頭之柴。忽落墜地。後頭之柴。亦卽墜下。其扁挑向後敲過。適中僧之腦袋。立即斃命。鄉人爲街坊人。擒送官廳。訊明定罪。其人見其事。與昨晚之言相符。遂將該僧遺囑。向官廳代求。勿治鄉人之罪。免累命債不清。官聞言。信因果不昧。命債難逃。遂赦鄉人誤殺之罪。其僧靈魂復至安息國。第三世又投胎爲太子。再出家修行。卽世高法師是也。以此驗知業繫難逃。如世高法師。前兩世均爲高僧。能知宿命。尙不能轉其宿業。而念佛法門。可以帶業往生。其殊勝又何如耶。

念佛法門。帶業往生一事。爲不可思議之功能。用自古及今。人多懷疑。昔有國王問沙門。（出家人之通稱）那先。（沙門名）云。念佛之人。可以帶業往生。

此事人難取信。答曰。大王。大石置水。沉否。王曰。必沉。又謂欲令不沉。其可得。

乎。王曰不可。又謂若以大石置大船上。運載他方。其可得乎。王領悟曰。當知衆生有業。必致墜落。如大石置水。必沉。念佛之人。仗承彌陀願力。接引往生。乘佛大願船。故得帶業往生。亦如大石置船。不沉。可運他方。觀此則自可斷疑生信矣。

更舉一事。以證帶業往生。昔張善和。一生殺牛爲業。一日病篤。將欲命終。見羣牛都來索命。或以角挑其眼。或以角刺其胸。或以頭撞其背。或以脚踢其身。驚怖無量。喚妻請僧救度。其妻爲請一僧。入室告善和曰。不必驚怖。汝今生殺業過重。無有他法可救。但當一心稱念阿彌陀佛名號。可以與汝解冤。可以令汝脫苦。隨我稱念。僧卽高聲念南無阿彌陀佛。善和一手執香。隨僧稱念。甫念數聲。善和曰。牛去矣。僧勸再念。求生西方。善和益加懇切。又同聲稱念。少頃高聲曰。佛來接我。遂插香合掌。念佛而逝。此卽帶業往生之明證也。

奉勸諸人看了善和念佛。帶業往生之因緣。須審察明白。不可錯會。若謂念佛。可以帶業往生。生前則恣意作業。依賴於佛。欲待臨命終時。再來念佛。帶業往生。千萬不可如是思想。當知臨終念佛。不是容易之事。若無夙世善根。臨終絕對不能念佛。張善和一生殺牛雖惡。前世確有善根。如無善根。卽不能要妻請僧救度。亦不能得遇有道高僧。教令念佛。惟望戒惡在先。莫待求佛於後。正好閒時多燒香。莫等臨時抱佛脚。古語云。臨崖勒馬收韁晚。船到江心補漏遲。

念佛第三殊勝方便。卽是可以徑登不退。蓮宗二祖。光明善導大師云。一餘門修行。迂僻難成。唯此法門。速超生死。一娑婆衆生。根鈍障深。發心修行者少。卽有發心。而堅固不退者更少。或因身見太重。保惜幻軀。稍涉辛勞。恐生妨礙。始勤終惰。工夫不能前進。或因環境惡劣。助道乏緣。正要發心修行。竟生諸般阻礙。無力排遣。遂退初心。或因病魔纏繞。四大不得自由。或因外魔

作崇。現形種種破壞。或因內魔撓亂。忽生異見邪解。古云「道高一尺。魔高一丈。」此皆退墮因緣。不勝枚舉。

縱有一生精進。用工到底。世緣已盡。功業未成。一經轉世。乃有隔胎之迷。竟昧前修。不能繼續。一墮紅塵。貪欲便生。仍舊沉淪苦海。不能超拔。余少時聞前輩僧說一故事。頗有道理。但未見書籍。今特錄載。以證隔生成退。卽蘇東坡學士相傳爲五祖戒禪師後身。才華雋秀。身入宦途。曾娶一妻數妾。沉迷五欲。竟不自覺。因與佛印禪師爲方外交。禪師欲度東坡。一日至其家過宿。東坡遣一妾入室侍奉。夜間禪師令其妾取七個爐子。用炭火燃着。再取一茶鐺。盛滿鐺水。囑置爐上煎之。水旣沸已。亦不泡茶。令置第二第三。以及各爐。次第輪煎。其妾不解何意。禪師則宴坐安然。茶鐺煎久。其水旣乾。爆的一聲。破壞了。禪師含笑。謂其妾曰。夜深可回安寢。次晨東坡問妾。昨晚禪師有何說話。妾卽以其事相告。東坡覺悟。若不斷欲。必致喪生。如爐上之鐺。水乾

必裂。但欲習非禪定之力。無由制止。是以東坡晚年習禪。

此土修行。欲求不退誠難。教中十信位菩薩。修習信心。或進或退。名爲毛道。衆生如空中毛。隨風而轉。須經一萬劫。修行信心滿足。始得善根成熟。入正定聚。方登初住。得位不退。至十行。得行不退。登初地。證念不退。自此任運進修。念念流入薩婆若。（譯一切智）海而念佛法門。古稱徑中捷徑。如果能生深信。發願求生淨土。力行念佛不輟。命終決定往生。圓證三不退。彌陀經云。一衆生生者。皆是阿鞞跋致。一 譯不退轉地不退有三。一位不退。預入聖流。不墜凡夫地。二行不退。恆常度生。不墜二乘地。三念不退。任運增進。證入如來地。非獨彼國久修上士。得證三不退。卽初生彼國下品衆生。莫不皆然。乃至臨終十念功成。帶業往生者。亦皆得證三不退也。如是殊勝方便。若非彌陀大願。持名奇勳。誰克臻此。

卅念佛能消業障第五

一切衆生自從無始一念妄動而有無明。從迷積迷。以歷塵劫。起心動念。多造惡業。能爲障礙。卽障蔽自己佛性。業障不除。佛性不得現前。故我釋迦如來。唱此念佛法門。教人消除業障。經云。一念佛一聲。能滅八十億劫。生死重罪。一何以念一聲佛號。能滅多劫重罪。以發心念佛。卽是大智慧現前。譬如一燈光明。能破千年暗室。念佛滅罪。亦復如是。

縱使業重障深。雖然念佛。依舊業識翻騰。妄想雜亂。此皆發心不切。念力不充。所以難敵業障。正未可因此反不念佛。經云。多障衆生念佛觀。果能一心稱念。是人當爲諸佛之所護念。彌陀之所光照。自得冥熏加被。業障可以漸消。善根日益增長。晉朝奉旨汰僧。帝慕廬山遠公之德。敕令廬山不在淘汰之列。時有二僧。一係瞎眼。一則跛脚。此皆業障深重之報。恐受淘汰。逃入廬山。哀求遠公收錄。依教修持。以終暮年。遠公令發宏願。修持念佛法門。以消業障。瞎眼僧發願。來生爲大知識。宏揚淨宗。跛足僧發願。來生身爲國王。興

隆三寶。此二僧惟仗念佛功德之力。消除業障。轉生各滿所願。瞎眼僧轉身爲永明延壽大師。乃一代高僧。以萬善莊嚴淨土。跛足僧轉身爲高麗國王。一生深信佛法。護持三寶。後至中國護永明大師之法。於淨土法門盛極一時也。

又昔有屠夫。殺豬爲業。其妻修持念佛法門。常勸其夫殺生業重。定招惡報。當念彌陀名號。消除業障。夫初不信。後經屢勸。始從。因其根機淺薄。旋念旋忘。其妻聰利善巧。設一方便。於各門上裝一鈴子。勸夫一聞鈴聲。則念佛一聲。每日如是。聞鈴卽記念佛。迨數年後。其夫病故。魂至閻羅王所。依業判罪。罰爲畜生。償還命債。飭鬼卒驅入豬胎。鬼卒持叉驅逐。叉上銅圈震響。猶如鈴聲。屠夫一聞。遂卽念佛一聲。是時有化蓮華。托住其叉。不觸其身。仗承念佛功德力故。卽時往生淨土。此卽念佛能消業障也。

業障。乃三障之一。依惑障而造業障。由業障而受報障。你我各各輪迴六道。



具足三障。若得宿業消除。新業不作。則果報自可不受。我佛教人念佛。卽是改往修來之法。於一句彌陀名號。專心繫念不輟。念念心光照着佛號。時時佛光照觸行人。心光與佛光交映。心力與佛力難思。卽此可消業障。如日光能破長夜重昏。風力能掃彌天宿霧。

世有發心修行之人。不信淨土法門。不肯念佛。縱得五種神通。尙難消除業障。昔有兄弟四人。同修異道。各得五通。一天眼通。能見一切境界。二天耳通。能聞世界諸聲。三他心通。能知他人心念。四宿命通。能知三世諸事。五神足通。能於他方往還。自在無礙。一日大兄已知。明日午時。無常到了。兄弟四人。同時而死。乃謂諸弟曰。你們知明日有何事否。諸弟俱答曰。明日午時。我四人無常到了。無常者。無能常住。死之別名。兄曰。當用何法以避之。諸弟曰。宜用神通之力。設法躲避。則彼無常鬼卒。(爲索命陰差別名)自然莫奈我。四人商議既定。大兄曰。我乘神力昇於虛空。二曰。我以神力潛於大海。三曰。我用

神力入於山谷。四曰。我以神力藏於市中。次日各運神力以避死厄。誰知業障未消。屆時四人神力俱失。昇空者則墜地而死。潛海者爲大魚吞食。入山者被餓虎所噉。藏市者則因衆人擁擠跌地。被踏身死。四人無一倖免。如憨山大師所云。一。世事由來多缺陷。幻軀焉得免無常。一。奉勸諸人。不必貪求神通。只要老實念佛。願生淨土。自可消除業障。臨終化佛來迎。永免無常之苦。而證眞常之樂。豈不善哉。

業之爲力甚大。世間衆生。皆是隨業所轉。惟有念佛。可消業障。卽八哥之鳥。念佛亦得帶業往生。昔人養一八哥。能學人言。一日僧至其家。念佛一聲。八哥卽學念南無阿彌陀佛一聲。僧再念。八哥亦念。迨僧去後。八哥每日常時念佛。其主人以其旣喜念佛。卽送僧寺。僧實奇之。遂與開導。有念念佛。及與無念念佛。二種工夫。八哥似有領會。一日僧見其將死。遂與助念。迨氣盡立亡籠內。後僧爲埋葬地中。數日地上生一蓮花。僧卽挖土。以究蓮自何生。乃

見此蓮。生自八哥之舌。後人頌曰。一有一靈禽八八兒。解隨僧語念阿彌。死埋平地蓮華發。我輩爲人豈不知。一當知八哥乃飛禽之屬。因學僧語。念佛尙能往生。舌出蓮華。足爲明證。而我等人。倫是爲萬物之靈。若不發心念佛。未免上辜佛化。下負己靈。故羅狀元云。一世上萬般渾是夢。無如亟早念彌陀。」

### 卅念佛莫求福報第六

世間有人發心念佛。不明念佛旨趣。或問之曰。汝精進念佛。所求何事。則答之曰。爲修來世。如是之人。就是願頭打錯了。我佛所以立此念佛法門。乃是爲着娑婆世界衆生。備受衆苦。逼迫心身。無法解除。故教人念佛。求生西方。可以離娑婆之苦。得極樂之樂。今念佛不願往生西方。乃願再生人世。享受人間福樂。實爲可惜。殊不知人間萬般皆是苦。空無常。何有真樂。縱得富貴榮華。得受世間財、色、名、食、睡五欲之樂。此等快樂。都非真樂。古德云。一只這

色身。誰信身爲苦本。盡貪世樂。不知樂是苦因。」

又經云。一財色名食睡。地獄五條根。五欲不除。塵不可出。一若求來世福報。轉生富貴之家。享受福樂。那知人間富貴花間露。世上功名水上漚。只恐福中不肯修福。報終必墮苦趣。其受樂之日短。而受苦之日長也。獅子峯云。箇箇戀色貪財。盡是失人身捷徑。日日飲酒食肉。無非種地獄深根。眼前圖快活一時。死後受苦辛萬劫。

念佛本來可以離苦得樂。若不求出娑婆。求生極樂。則身在娑婆苦海。苦終不離。娑婆是極苦世界。其苦無量。說不能盡。今按人中略說八苦。舉世之人。皆不能免。

一、生苦。世人都是隨業受報。依前生之業緣。與父緣母緣。三緣和合。中陰身方得投胎。初見父母交媾。忽動欲念。由是流愛爲種。納想成胎。處在母身。生臟之下。熟臟之上。中爲胞胎。母吃熱時。熱深難忍。幾如鑊湯地獄。母吃冷時。

冷觸壓迫。無異寒冰地獄。幽囚十月。臭穢雜處。是名胎獄。又當出胎之時。胎衣脫下。便受風刀割身之苦。故孩兒出世時。便就哇哇叫苦。凡爲人者。莫不皆然。

二、老苦。歲月遷流。形容變易。眼花耳聾。髮白面皺。身枯齒落。力弱氣銷。凡事不得自由。一切仰賴於人。楞嚴會上。佛問波斯匿王。一大王汝之形容。應不頓朽。王言。變化密移。我誠不覺。寒暑遷流。漸至如此。我念孩孺之時。膚腠潤澤。年至長成。血氣充滿。而今頽齡迫於衰耄。髮白面皺。逮將不久。一如此可見。雖是國王。貴爲天子。富有四海之內。老苦亦所不免。古人云。一黃金不是千年業。紅日能消兩鬢霜。一

三、病苦。人身四大不調。百種病生。世間少有一生無病之人。古德云。一病到方知身是苦。健時都爲別人忙。一姑勿論沉疴酷疾。即使齒痛頭暈。則不自在。行坐不安。寢食頓減。以此例知。一切諸病。無非是苦。三國張飛。性情剛勇。

對諸葛武侯曰。我誰人都不怕。於是武侯掌中書一病字。與他一看。問曰。這  
個汝怕不怕。張飛大聲疾呼曰。噫吓可怕。足見病苦臨身。卽英雄力士亦復  
無可奈何。吾人能於病中。一心念佛。不爲病苦所惱。如是則臨欲命終。百苦  
交煎之時。自然亦有把握。

四、死苦。經云。一因緣和合。虛妄有生。因緣別離。虛妄名滅。一人身有生。則必  
有死。生時假借四大以爲身。死時則四大分離。喻如生牛剝皮。痛苦萬狀。皮  
肉筋骨爲地。大津液精血爲水。大周身煖觸爲火。大鼻息出入。手足運轉。爲  
風。大死時風大先離。故鼻息斷絕。手足不動。次火大離時。身發冷觸。三水大  
離時。尸水流溢。只剩皮包骨頭之地。大。諺云。一白骨山頭化土泥。一是一也。死  
之一事。爲世人所必經之事。無一人可以倖免。吾人未至死時。當善觀察。世  
間最大爲生死。白玉黃金盡枉然。縱使妻兒相惜。無計留君。假饒骨肉滿前。  
有誰替汝。我看他人死。我心熱如火。不是熱他人。也要輪到我。古人云。一紅

紅白白莫相瞞。無位真人赤肉團。死去不如豬狗相。卽今便作死屍看。一豬狗死時。其肉尙有人要買。人若死時。誰人肯要。

五、愛別離苦。愛卽恩愛。世間恩愛。莫過於父母兄弟。妻子眷屬。最難捨離。總望常相聚會。舉家歡樂。倘若別離。則心如刀割。卽所謂千種情懷。千種恨。一分恩愛。一分憂。殊不知人生聚散。本屬無常。有合則必有離。何須痛苦。古云「父母恩深終有別。夫妻義重也分離。人生似鳥同林宿。大限來時各自飛。」

六、冤憎會苦。冤卽冤家。憎乃憎嫌。此皆宿業所感。重者結冤。搆仇。輕者厭憎。嫉視。冤憎之人。若能遠離。其苦自無。那知業力使然。欲離偏合。或爲父子。或爲兄弟。或爲夫婦。或爲朋友。冤則索命討債。憎則刺激精神。因緣聚會。無法脫離。亦如啞子吃黃連。有苦說不出。羅狀元詩云。是非非何日了。煩惱煩惱幾時休。

七、求不得苦。世間那有十足之人。若有不足。則必有求。所求順遂。自必稱心。

喜形於色。若求不得。竟生懊惱。日坐愁城。此等都是癡迷不覺。當知得失有定。貧富在天。豈不聞。一世事忙忙似水流。休將名利掛心頭。粗茶淡飯隨緣過。富貴榮華莫強求。一

八、五陰熾盛苦。五陰乃色、受、想、行、識。五種煩惱之火。焚燒衆生之心。煩惱若重。如火熾盛之貌。或依內根外塵。所起煩惱。屬色陰。或依五識。領納五塵。所起煩惱。屬受陰。或依意識。想念法塵。所起煩惱。屬想陰。或依七識。恆審思量。所起煩惱。屬行陰。或依八識。微細流注。所起煩惱。屬識陰。前七種苦是別。別指一種而言。此一種苦是總。總括諸苦而說。真是世事萬般皆是苦。何如及早念彌陀。

以上八苦。但就人道路說。無論智愚賢不肖。皆不能免。所謂千人千般苦。苦不相同。若發願修來世。再來做人。還是吃苦。豈不是打錯了願頭。我平日教人念佛。一定要求生淨土。方能離苦得樂。彌陀淨土。是無有衆苦。但受諸



樂。超過諸佛國土。念佛之人。不但不可願來生。再來人間享福。並不可願身後。生天受樂。以天福亦有終盡。一八萬劫總是空亡。三千界悉從淪沒。一永嘉禪師云。一布施持戒。生天福。猶如仰箭射虛空。勢力盡。箭還墜。招得來生不如意。一當知求生淨土。經稱少善不生。多福乃致。省庵大師云。一言多福。則莫若執持名號。言多善。則莫若發廣大心。是以暫持聖號。勝於布施百年。一發大心。超過修行歷劫。蓋念佛本期作佛。大心不發。則雖念。奚爲發心。原爲修行淨土不生。則雖發。易退。是則下菩提種。畊以念佛之犁。道果自然增長。乘大願船。入於淨土之海。西方決定往生。一故勸念佛之人。莫求天上人間福報。如以明珠。而買一食一衣之飽煖。豈不可惜。應當願生淨土。如彌陀經。佛勸發願云。一衆生聞者。應當發願。願生彼國。一

### 卅念佛能斷煩惱第七

煩惱之爲害甚大。自有根本煩惱。發生枝末煩惱。本末重重。頭數無量。世人

多將煩惱二字錯解了。以遇逆境。心不愉快。叫做煩惱。不知煩惱二字。乃麤細迷惑心之總名。如貪心、瞋心、癡心、疑心、慢心、邪見心。是六種根本煩惱。能生一切枝葉煩惱。如懈怠心、放逸心、昏沉心、散亂心、無慚心、無愧心、諂曲心、嫉妬心等。皆是枝末煩惱。共有八萬四千之多。以是昏煩之法。而能惱亂衆生真性。故名爲煩惱。

煩惱是苦因。生死爲苦果。苦因不斷。苦果決不能離。一切衆生。皆依煩惱惑。而造種種業。由此惑業爲因。定招生死果報。所以發心修行。就是要斷煩惱。而了生死。煩惱是衆生內心之病。或外身有病。可請中西醫士。用各種藥品療治。而得痊愈。惟此煩惱心病。中西醫士。皆束手無策。一切藥品。皆不生效力。祇有我佛醫王。所說念佛法藥。能治煩惱心病也。

煩惱雖多。總分不出二種。一爲我執煩惱。二爲法執煩惱。三界之內。六道衆生。二執煩惱全具。何謂我執煩惱。卽一切衆生。都執此身。以爲實我。不知諸

法本來無我。這個身心。乃是五陰積聚所成。安有實我可得耶。

先就外身研究無我。外身屬色陰。是地水火風。四大色法和合而有。皮肉筋骨。歸地大。痰淚精血。歸水大。周身煖熱。歸火大。鼻息出入。一切動轉。歸風大。四大歷歷可指。外身除却四大。何者是我。

次就內心研究無我。內心屬受想行識四陰。四陰不出八個識。前五識領受五塵外境。是受陰。第六識想像法塵內境。是想陰。第七識念念遷流。是行陰。第八識執持壽命。是識陰。八識界限分明。內心捨此八識。何者是我。

此中四陰之解。乃指八識。而與諸家不同。諸家以受想行三陰。指徧行五心所中。受想思三心所。識陰總指八個識。余意心法。共有八識。心王五十一心所。何以獨取三心所。而配三陰。故不循舊解。今乃以受陰指前五識。因其受。力偏強。故想陰指第六識。因其想力最勝。故行陰指第七識。因其恆審思量。故識陰獨指第八識。因其執持壽命。故四陰分指八個識。可包心王心所。一

切心法在內。受想思三心所。亦復不遺。

今於現在身心之中。仔細推求。皆無有我。又復推求過去。而當父母未生以前。若是有我。我在何處。又復推求未來。眼光落地。命終之後。若是有我。我作何相。過現未來。三際求我。無我可得。衆生不了無我之理。迷執身心。以爲實我。是爲我執煩惱。能障我空真理。此屬內心第一種大病。

何謂法執煩惱。卽一切衆生。都執世間所有諸法。以爲實法。不知諸法本來不實。如空中華。如夢中境。無體可得。須知空本無華。病眼妄見。夢中之境。睡者妄現。何嘗是真實。世間所有諸法。亦復如是。金剛經云。一凡所有相。皆是虛妄。一衆生迷執諸相。以爲實法。是爲法執煩惱。能障法空真理。此屬內心第二種大病。衆生所執我法。二種煩惱。都由虛妄想念。分別而生。若無方便對治之法。則二執畢竟無由斷除。故我釋迦如來。觀機施教。說此念佛法門。教人稱念彌陀名號。以一念而除衆念。妄念既除。煩惱自斷。一句佛號。如金

剛王寶劍。煩惱妄念。喻如劫賊。賊若來時。寶劍卽舉。賊當自退。念佛之法。亦復如是。貪心煩惱起時。卽一心念佛。而貪心自息。瞋心癡心等起時。悉皆如是。專念彌陀。一心不亂。則一切煩惱。自可斷除盡淨矣。

世人多有不信念佛法門。都說稱念一句佛名。有何用處。不知一句彌陀名號。具有不可思議神力。能治一切煩惱心病。如阿伽陀藥。能醫衆病。世間之藥。尙有殊勝功用。以一藥能愈衆病。何況萬德佛名。念之豈不成益。余每當逆境之來。心生煩惱。遂卽經行念佛。四步一聲佛號。四步一聲佛號。循環往復。念之數匝。漸覺心地清涼。熱惱自息。又有時事多心擾。更深不能成寐。亦專稱佛號。歷時少頃。卽心神安定。便能睡着。無諸夢想。又當寫經之時。一筆一句佛號。一筆一句佛號。精神不散。妄念不起。寫久亦不覺辛苦。故每教弟子寫經念佛。依教而行者。頗不乏人。因此而念佛進步。能得真實受用。少起煩惱。由是均信念佛。是有莫大之功效。人人果能信此念佛一法。專心稱念。

無有間斷。念到心空境寂。煩惱自然無自而生。

或曰。念佛求生西方。貪求極樂世界之樂。此是貪心用事。貪是根本煩惱中。第一種煩惱。貪心不除。何得謂爲念佛。能斷煩惱耶。答曰。貪之名雖同。而貪之實不同。世人貪著世間塵勞之樂。樂必招苦。此貪卽是生死本。今念佛貪求淨土極樂之樂。樂能離苦。此貪乃爲解脫法。我佛教人念佛。正是透機之教。觀見衆生貪戀世間色聲香味觸五塵之境。念念不捨。以苦爲樂。故教人念念念佛。求出娑婆。求生淨土。而得享受極樂之樂。乃爲真樂。

佛以念佛求生淨土。離苦得樂。投合衆生厭苦貪樂之心理。乃是以貪止貪之方法。以貪求極樂之一貪。而除貪求塵勞之諸貪。若無此貪。則諸貪無由頓除。譬如止靜之聲。若無此聲。不能遏止諸聲。例如衆人之中。喧譁混雜。一人高聲喊云。大家不要說話。其聲一出。衆聲自止。今貪求極樂之貪。亦復如是。不獨無損。而且大益。余平日。或見清淨園林樓閣。心生愛慕。卽轉念西方。

行樹羅網。七寶樓閣。勝妙多矣。不必貪此。趕快一心念佛。求生彼國。或聞可愛之聲。卽念西方。寶樹羅網。出微妙音。譬如百千種樂。同時俱作。或嗅諸香。卽念西方。寶蓮行樹。香風時來。六時無間。或見美食好衣。卽念西方。思衣得衣。思食得食。自然美妙。故對色、聲、香、味、觸、五塵諸境。因羨慕西方極樂勝境。而貪心漸息。

今細將娑婆世界。研究一番。具足衆苦。實屬可厭。無一可貪。卽以修行論之。娑婆難修。極樂易進。以兩土苦樂對比。乃略舉十種。一者。此土有不常值佛。苦。彼土則花開見佛。常得親近之樂。二者。此土有難聞佛法苦。彼土有水鳥樹林。皆宣妙法之樂。三者。此土有惡友牽纏苦。彼土有諸上善人。俱會一處之樂。四者。此土有羣魔惱亂苦。彼土有諸佛護念。遠離魔事之樂。五者。此土有輪迴不息苦。彼土有橫截生死。永脫輪迴之樂。六者。此土有難免三途苦。彼土有永離惡道。名且不聞之樂。七者。此土有世緣障道苦。彼土有受用自

然不俟經營之樂。八者此土有壽命短促苦。彼土有壽與佛同。更無限量之樂。九者此土有修行退失苦。彼土有入正定聚。永無退轉之樂。十者此土有佛道難成苦。彼土有一生補處。速證菩提之樂。以此而觀。貪求念佛往生。此貪爲大貪。卽此一貪。可斷貪瞋癡等一切煩惱之心病。但望人人。都能貪求往生極樂。則對婆婆五塵欲境。自然不貪。雖同是貪心。實未可以一概論也。余曾有勸修淨土一偈云。一百歲光陰能幾何。勸君及早念彌陀。莫貪五濁娑婆界。極樂蓮邦勝得多。一

卍念佛速了生死第八

世間大苦。莫甚於生死。有生則有身。有身則衆苦所集。老子曰。一吾有大患。爲吾有身。吾若無身。夫復何患。一佛云。一身爲衆苦之本。一以此身卽是生死苦果。無量劫來。捨身受身。不知經了多少生死。輪迴六道。易報改形。頭出頭沒。無由了脫。今得人身。須當猛省。切莫因循錯過。辜負此生。古德云。一此



身不向今生度。更向何生度此身。」

欲度此身。須假修行。六道之中。餘道難修。一天道。天中著樂。色、聲、香、味、觸。五塵欲境殊勝。被境所迷。不思修行。如世間富貴之人。修行二字。竟不喜聞。二阿修羅道。修羅瞋心方熾。多好鬪諍。不肯修行。三地獄道。地獄依業受罪。神識昏迷。不能修行。四餓鬼道。餓鬼饑火交然。呼號求食。不得修行。五畜生道。畜生愚癡成性。但知食睡。不識修行。裴相國云。一整心慮。趣菩提。惟人道爲能耳。」我等既得人身。若不修行。未免辜負所生。生死何時得了。

生死有二種。一段段生死。約外身說。指身形有長短大小。分劑段落。而受生死。二變易生死。約內心說。指心念有生住異滅。遷變移易。亦屬生死。三界之內。六道衆生。具足二種生死。界外三乘聖人。無有分段生死。但受變易生死。若二種生死都不受者。唯佛一人。當知生死。是由煩惱所造成的。佛則轉煩惱爲菩提。了生死證涅槃。故不受生死。

三界內之衆生。欲求了脫生死。豎出三界則難。橫超三界則易。何謂豎出三界則難。世人若修九次第定。由一定而入一定。次第而升。先修色界。初禪離生喜樂定。二禪定生喜樂定。三禪離喜妙樂定。四禪捨念清淨定。再修無色界。空無邊處定。識無邊處定。無所有處定。非想非非想處定。此八是世間有漏禪定。若不得第九滅受想定。則不能了脫三界生死。後一是無漏禪定。此九定順序而入。不得超越。故名九次第定。中間經歷無量時劫。九定完成。方能豎出三界。得阿羅漢果。若但得前八種定。未進第九定。終不能了脫生死。如鬱頭藍弗仙人。修到非想非非想定。天報享盡。還墮飛狸之身。故謂豎出三界則難也。

何謂橫超生死則易。卽是念佛法門。往生極樂。極樂世界。與娑婆世界。同在一刹。此刹種共有二十層。娑婆極樂同居第十三層。彌陀經云。一從是西方。過十萬億佛土。有世界名曰極樂。一是平橫而過。娑婆衆生念佛功成。

往生極樂。卽是橫超三界。疾出生死。便得圓證三不退。壽命同佛。無量無邊。阿僧祇劫。譯無數劫蓮花化生。卽是最後之身。不必再受生死輪迴。除乘願再來。入世利生。則各隨本願。非隨業而受生也。而念佛之人。乃是一念功成。一生事辦。故謂橫超生死則易也。

豎出三界。如蟻子上於高山。橫超三界。如風帆行於順水。又譬如毛笋內生一蟲。笋長成竹。蟲在竹中。欲求出離。若向上咬竹節。咬穿一節。復有一節。努力咬去。未到竹梢。命已先死。此喻衆生。豎修九次第定。求出生死也。若從竹邊咬一洞。洞穿卽能得出。此喻衆生。精修念佛法門。橫超生死也。其難其易。不啻天淵。

念佛法門。雖可橫超三界。速了生死。而於臨命終時。是一最大關頭。果然平日信願深切。淨行成就。或得理一心不亂。或得事一心不亂。自可預知時至。正念昭彰。一切境緣。不能爲礙。則其往生也。如入禪定。一彈指頃。託質寶蓮。

業卸塵勞。神棲安養。圓證三不退也。

倘若信願行三資糧。雖然具足。未得事一心不亂。理一心不亂。則臨終時。還須道友助念。幫同念佛。助成正念。方得往生。最怕臨終之時。以種種事緣。擾亂其心。打失正念。有礙往生。凡爲道友。徒眷家屬。當明此理。助念爲要。

如在家居士。一生念佛。志願往生。最好將家務。以及身後各項。預早安排。交待清楚。或立遺囑。以免臨命終時。有所罣礙。併須嚴囑家庭眷屬。臨終之時。一齊助念。不得提起家務。種種情緣。牽絆之事。切忌啼哭。擾亂其心。臨命終時。一念若差。則不能往生。關係重大。請勿忽視。深望爲眷屬者。當以助道爲孝。勿以情愛。而誤往生大事也。凡我等念佛求生淨土之人。當知一生辛勤。收功就在末後一着。當臨欲命終。正是聖凡立判之時節。此時應當萬緣放下。寸絲不掛。一心專念彌陀聖號。求見我佛接引。求生上品蓮臺。正念昭彰。往生可必。一剎那間。離五濁。屈伸臂頃。到蓮池。故曰念佛速了生死。

卅念佛具足三學第九

念佛有四種。一實相念佛。依實相理。念法身佛。法身清淨。猶若虛空。徧一切處。實無有相可得。本無能念之心相。亦無所念之佛相。能所雙亡。心佛不二。卽心是佛。卽佛是心。若念實相佛。則無念而念。念卽無念。一心不亂。湛然常住。是爲理念。

雲棲云、一念空眞念。生入無生。念佛卽是念心。生彼不離生此。心佛衆生一體。中流兩岸不居。古德云、一句彌陀五十年。分明掘地討青天。而今好個眞消息。夜半鐘聲到客船。此皆明理念工夫者也。

二觀想念佛。卽觀無量壽佛經所說。因韋提希夫人。生忤逆子。名阿闍世。隨順提婆達多惡友之教。奪父王位。囚閉其父。頻婆娑羅王於七重暗室之內。制止羣臣。不得往見。欲令餓斃。夫人送酥蜜麩。及葡萄漿。與王飲食。遂得不死。至三七日。阿闍世王問守者。老王猶存否。答曰尙在。卽問何人送食。而得

不死。守者白言。惟有夫人入宮。及沙門目連。富樓那二人。常飛空而來。爲王說法。故無法禁止。阿闍世王聞言大怒。於是提劍欲殺其母。大臣月光及耆婆。諫之不聽。遂拂袖而去。於是世王驚懼不敢殺母。乃將母閉於幽暗宮中。不令得出。韋提希悲泣雨淚。遙向耆闍崛山頂禮釋迦世尊。佛卽現身。令其得見。夫人懇切悲哀。禮佛發願。來生不願生此濁惡世界。願生清淨佛國。我佛卽以神力。普現十方清淨佛國。令其揀擇。願生何國。夫人乃揀西方極樂世界。清淨莊嚴。願生彼國。佛卽爲說十六妙觀。依法界心。觀法界境。以爲求生之要。然觀法幽微。修頗不易。先觀落日者。所以標想西方。而令向彼佛也。次觀水。三觀地。四觀樹。五觀池。六總觀。七華座。八像觀。九佛身。十觀音。十一勢至。十二普觀。十三雜觀。十四十五十六。觀上中下三輩。九品往生。令其捨劣而取勝也。觀行成就。卽得往生彼國。

三觀像念佛。卽靜坐觀佛形像。先觀彌陀眉間白毫相光。毫相觀成。漸次觀

佛面部以及全身。觀像功成。卽能隨身所向。皆得見佛相好莊嚴。

四持名念佛。卽佛說阿彌陀經所示執持名號之法。不假參究。不必觀想。不勞觀像。但一心稱念阿彌陀佛。萬德洪名。或加南無（譯皈依）二字。更可表示皈敬之意。念佛之法。貴在一心。口念心念。心口如一。若口念心不念。難成功效。心念口不念。此則無妨。還要念念相續。勿令間斷。果然精進不懈。則極樂世界。七寶池中。蓮蕊日益增大。蓮花日見光榮。這個蓮蕊。雖是無情之物。而有感應冥符之妙。此方衆生發心念佛之時。西方蓮蕊當卽標名。勤惰纔分。榮枯立見。還有勝劣分明之妙。功行淺深。品分高下。無量往生。不相錯謬。命終往生。卽生此華。此華乃脫凡殼之靈宮。安慧命之神宅。古云「他年淨土蓮開日。憶得婆婆念佛時。」

念佛之法。易則甚易。幾歲孩童。一教便會。並沒有甚麼奧妙。難則誠難。八十老僧。尙念不好。未得一心不亂。工夫總未成功。世人每有以其易修之故。殊

多不信。以爲修行。必須有祕奧玄妙之法。修之方能獲益。是以近來多有向修淨土僧俗。捨念佛而修密宗者。殊不知淨密同功。淨土則清淨三業。密宗則三密相應。實乃異途同歸。何必捨此取彼。余生平本無門戶之見。初學禪宗。後則兼修淨土。深知禪淨同功。先學天台。後學賢首。乃知台賢一致。始學性宗。繼學相宗。了知性相不二。今對密教。亦極信仰。固知顯教是佛所說。密教亦佛所說。我佛觀衆生之機。應得顯益者。爲說顯教。應得密益者。爲說密教。顯密雖殊。同爲對機。應病之法藥。故對顯密。同一信仰。

余前至南京。及湖南湖北講經時。聞有密宗傳法法師。每每勸人修習密宗。不必茹素。以持戒爲小乘之行。大乘離相。有何持犯。况佛在世。亦許比丘食五淨肉。又云食衆生之肉。卽是度彼衆生。但未悉斯言。出何經論。我只知菩薩具同體大悲。觀一切旁生。皆有知覺。與我悉皆同體。本具佛性。不忍殺彼。將其身肉。供我口腹。若云食其肉。卽爲度他。則對衆生。應當平等。而度脫之。



何以獨對豬羊鷄鴨魚蝦之類。日日食之。而對蜈蚣蚰蜒。腹蠟糞蟲之類。爲何竟不食不度耶。又對自己眷屬。何亦不食其肉而不度耶。此種妄言惑衆。分明貪求肉食。不能持戒。反美其名曰。食他卽是度他。自作教他。疑誤衆生。定招惡報。甚有多年茹素念佛之人。被其所惑。而至開葷密功未成。淨戒先破。誠爲可惜。豈不痛哉。此爲余所不贊同也。

楞嚴經云。一我滅度後。末法之中。多此鬼神。熾盛世間。自言食肉得菩提路。一又云。一汝等當知。是食肉人。縱得心開。似三摩地。皆大羅刹。報終必沉。生死苦海。一佛言如是。謹當遵從。切勿被邪說所誤。以食肉爲無礙之道。豈不聞古詩云。一血肉淋淋味足珍。一般痛苦怨難伸。設身處地捫心想。誰肯將刀割自身。一又詩云。一千百年來碗裏羹。冤深似海恨難平。欲知世上刀兵劫。但聽屠門夜半聲。一修行之人。不能勸人戒殺放生。反自食肉。令人殺生。悲心何在。凡有志修行者。宜辨邪正。明是非。重因果。識去取。余平日總是勸

人茹素念佛以修身。莫欠衆生來世債。或有說天生萬物以養人。一切禽獸。原是天生把人吃的。此是邪解。最能誤人。令人造罪。要知天生萬物。指米麥豆蔬等類。可以養人。並非指畜類。一切畜生。貪生怕死之心。與人類無異。若以強欺弱。殺食其肉。必結深冤。必欠命債。一定要報仇的。世間殺劫。皆是殺生食肉所造成的。古云。一世間欲免刀兵劫。除非衆生不殺生。一若人欲學密宗可也。而學吃葷則不可。未曾念佛。而學密宗亦可。既經念佛。而竟改途易轍。此皆信不深。願不切。良可歎也。

念佛一法。切切不可看輕。乃是最簡單。最圓妙之無上法門。可謂大陀羅尼（譯大總持）門。能總一切法。能持無量義。釋迦說法四十九年。不出經律論三藏。三藏所詮。卽是戒定慧。三無漏學。經爲定學藏。律爲戒學藏。論爲慧學藏。一句彌陀名號。一心稱念。卽可具足戒定慧三學。其圓妙爲何如耶。

念佛何以能具戒學。楞嚴經云。一所謂攝心爲戒。由戒生定。因定發慧。是則

名爲三無漏學。一而念佛正是攝心之法。佛知衆生第六意識妄想心。念念攀緣六塵境界。多諸散亂。如妄心攀色塵之緣。而起貪瞋癡之惑。造殺盜姪等業。毀諸戒律。攀聲塵、香塵、味塵、觸塵、法塵等緣。亦復如是。

佛教衆生稱念佛名。卽是以念佛之正念。止息攀緣之妄念。倘妄心攀色塵之緣。卽專念阿彌陀佛。淨念相繼。自不隨色塵所轉。攝歸念佛之正念矣。攀聲塵等緣。一一如是。自然不至破戒作惡。安心如馬。六塵如六條馬路。佛號如馬韁。念佛者如御馬之人。其馬欲向各馬路奔馳時。其韁在手。卽把勒回。既不攀緣。妄念自無。不至犯戒。卽是以念佛攝心爲戒也。

念佛念到念念與佛相應。諸念當然不起。意業便得清淨。則衆戒自然具足。身口二戒。亦由意業所起。身業作殺盜姪。乃是意業所驅使。意業不想殺盜姪。身業自不至犯戒。口業說妄言、綺語、惡口、兩舌。亦是意言所發現。意業不想說妄言、綺語、惡口、兩舌。口業亦不至犯戒。故念佛稱爲淨業法門。一念佛

名能淨三業。此豈不是念佛具足戒學之明證也。

念佛何以能具定學。彌陀經云。一若有善男子。善女人。聞說阿彌陀佛。執持名號。若一日。若二日。若三日。若四日。若五日。若六日。若七日。一心不亂。一不亂卽是定。此乃萬世持名念佛從出之大原。乃金口所親宣之妙法也。亦卽念佛具足定學之實事。一心者。專一其心。純一無雜。不亂者。湛然寂靜。而不動。亂既得一心。自然不亂。果能不亂。纔是一心。念佛念至一心不亂。其定力爲何如耶。

佛之所以教人念佛者。正以衆生之心。多隨境轉。從朝至暮。從年竟歲。從生至死。都是對境生心。念念分別。起滅不停。紛亂無緒。例如眼根見色。無論是好是醜。則被色動。耳根聞聲。無論是讚是謗。則被聲動。鼻根嗅氣。無論是香是臭。則被氣動。舌根嘗味。無論是美是惡。則被味動。身根對觸。無論是遠是順。則被觸動。意根緣法。無論合意不合意。則被法動。故佛教人一心念佛。不

起妄念。不爲境動。如果專念於佛。心不攀外境之緣。淨念相繼。則六根都攝。如如不動。卽入三摩地（譯正定）矣。

或問念佛如何可以不爲境動。答曰。念佛之時。其心歸一。心念於佛。佛不離心。六根雖是對境。而不攀緣。自然不爲境動。所謂百花叢裏過。葉葉不沾裳。我身如佛殿。六根如六門。念佛之心。如殿中人。佛卽殿中佛。其人在殿中。瞻仰戀慕於佛。一心專注不散。則雖六門洞開。門外所有種種境界。渾然不見。不聞。不知。不覺。念佛亦復如是。念得心空境寂。視而不見。聽而不聞。分別不生。如古德云。一鐵牛那怕獅子吼。恰似木人看花鳥。但自無心於萬物。何妨萬物常圍繞。一自然不被境動矣。

又一心不亂。卽念佛三昧功成。三昧是印度語。譯爲正定。念佛念到一心不亂。卽得正定。如成具光明定意經云。一空閒寂寞。而一其心。在衆煩惱。而一其心。乃至褒訕利失。善惡等處。而一其心。一念佛能得一心。此豈不是念佛。

具足定學之明證耶。

念佛何以能具慧學。一切衆生本來是佛。具有佛慧。昔日世尊於菩提樹下。臘月八日夜觀明星。忽然悟道。三歎奇哉。一切衆生具有如來智慧德相。祇因妄想執著。不能證得。若離妄想。則無師智自然智。一切顯現。一世尊親見此理。欲令衆生證入佛慧。故教人持名念佛。卽是離妄想得智慧之妙法也。

衆生雖具佛慧。奈爲無始一念無明所誤。從迷積迷。以歷塵劫。無量妄想煩惱。障蔽自心。以致本有佛慧。不得現前。喻如淨鏡。本具光明。而爲塵垢所障。淨光隱沒。衆生之心如淨鏡。本具佛慧。如鏡中本有光明。麤細妄想煩惱。如所有塵垢。鏡上塵垢。須假擦磨之功。而得清淨。心中妄想煩惱。必仗念佛之力。可以斷除。

佛之教人稱念佛名。卽授以擦磨心鏡。斷除妄想煩惱之法。行住坐臥。不離

一句佛號。念茲在茲。無有間斷。則妄想自離。而佛慧自發。此卽念佛能發慧學之功用。

念佛三昧。又名一行三昧。文殊般若經云。一佛告文殊。欲入一行三昧者。應處空閒。捨諸亂意。不取相貌。繫心一佛。專稱名字。隨彼方所。端身正向。(向西方)能於一佛。念念相繼。卽是念中。能見過去。未來。現在。諸佛。念一佛功德。與念無量佛功德無二。阿難所聞說法。猶住量數。若得一行三昧。諸經法門。一切分別。皆悉了知。晝夜宣說。智慧辯才。終不斷絕。一此豈非念佛具足慧學之明證耶。

### 卍念佛普攝羣機第十

念佛法門。對上中下三種根機。無機不攝。有情衆生。具有知覺。但發真心。無一不能得度。只要一心稱念六字洪名。不必廣學諸法。善導大師云。一若要學解。從凡夫地。乃至佛地。一切諸法。無不當學。若欲學行。當擇其契理契機。

之一法。專精致力。方能速證實益。否則經劫至劫。尙難出離。一念佛卽是契理契機之法。今略舉十種人。正好念佛。請各三思。趕快發心。

一出家人。正好念佛。既已削髮爲僧。發心修道。割恩斷愛。背井離鄉。住清淨之伽藍。受現成之供養。無憂無慮。不羈不絆。正好發心念佛。求出生死。念佛之時。就要生死心切。念生死輪迴。依業受報。無有了期。必須精專懇切。念去萬念自然放下。六根自可都攝矣。今舉一例。

昔有國王。見外道苦行比丘。(出家男僧之通稱)清閒。一日謂一念佛僧曰。朕見

婆羅門。(修外道之人)勤苦求道。比丘但念佛名。相去遠矣。僧對曰。修道不在

色身上。苦不苦。而在生死心切不切。僧人雖清閒念佛。而求出生死之心。特切。六根終日對境。而六根都攝。眼根不見色。耳根不聞聲。乃至意根不緣法塵之境。王聞不信。僧知其意。卽啓白王言。可借一事以驗之。請王明日。派宮娥綵女兩班。一班在東街跳舞。一班在西街唱歌。另着一囚犯。盛油一罐。交



其執持。告言汝罪應死。今交汝油。持向四街行走。令四人持刀隨行。若油在何處傾出。立即斬首。若行竟。油不傾出。賜汝無罪還鄉。囚犯聞已。心思今日是個生死關頭。乃一心專注。所執之油。不敢絲毫疏忽。四街行竟。油不傾出。歸至王所。乃赦其罪。僧請王問囚犯曰。汝於東街見何物最爲美觀。答曰不見。又問西街聞何聲最爲好聽。答曰不聞。王斥曰。亂道。東街綵女跳舞。西街綵女唱歌。豈得不見不聞。答曰。大王。我一心顧着這罐油。那裏還有心去看去聽。是以不見不聞。王忽悟此僧所言。一心念佛。求脫生死。六根都攝。不見不聞。斯言誠不謬也。而念佛之人。生死心切。乃是真念佛。

二女界人。正好念佛。託生人世。秉質女流。不出戶庭。執掌內政。非若男子之奔走四方。身勞神役。故正好發心念佛。求生淨土。又女人月經不淨。生育痛苦。多有厭惡女身。欲爲男子者。而此娑婆世界。有欲轉女成男。誠非易事。須經幾世修行。若肯專心念佛。則臨命終時。娑婆業卸。淨土緣深。蓮華化生。卽

是大丈夫之相。一生可轉男身。而且壽命無量。得與觀音勢至。把手共行。女界之人。既有這個微妙法門。可以滿汝願望。望大家趕緊念佛。

三聰明人。正好念佛。世人聰明難。而不爲聰明所誤。更難。每見聰明。恆多自誤。只因好奇好妙。反視念佛爲平常。費盡心機。徒求世智。那知一生前枉費心千萬。死後空持手一雙。一若肯以聰明。用之於佛法。多看淨土經書。研究念佛宗旨。了知持名念佛一法。爲諸佛所護念。羣賢所繼述。以一念而空塵念。藉一佛而證淨心。專心致力念去。卽事念而達理念。親見自性彌陀。得生唯心淨土。豈不快哉。

四愚癡人。正好念佛。人無論智愚。而佛性一也。愚癡之人。祇因前生不信佛法。不肯修學。惑深業重。故感此報。若是聰明之人。則賢者多勞。念佛恐難一心。而愚癡之人。則事少身閒。正好念佛。又愚人心直。知見不多。容易生信起行。而持名念佛法門。不假參究。不勞觀念。故不怕愚癡。祇要直心道場。將一

句佛號。驀直念去。努力無間。卽得成功。古詩云。一修行如駕上灘舟。暫歇篙時便下流。若不從茲勤努力。幾時撐得到灘頭。一此數語。可爲念佛之助也。五富貴人。正好念佛。今生富貴。都從前世修來。當知娑婆福樂。終不久長。古云。一榮華終是三更夢。富貴還同九月霜。一正好趁此福樂。衣食無憂。受用具足。發心念佛。求生淨土。登不退地。享無爲樂。西方邊地。猶勝天宮。娑婆福樂。何足與比。亟宜猛省。一心念佛。庶可捨娑婆劣報。而得極樂淨身。

六貧賤人。正好念佛。今生貧賤。都由夙業所招。往昔不肯布施修福。傲慢貢高。故感此報。既無田園產業。又無房屋棲身。衣不蔽形。食不充口。自出娘胎。飽受衆苦。正好念佛。求生淨土。而七寶樓閣。不俟經營。自然衣食。隨念而至。可以永離貧賤之苦。有此良好法門。慎勿錯過。

七老年人。正好念佛。桑榆晚景。歲月無多。如魚少水。斯有何樂。如囚赴市。步步近死。急宜懇切志誠。發心念佛。求生淨土。善導和尚偈云。一漸漸雞皮鶴

髮看看行步龍鍾。（竹名取搖動貌）假饒金玉滿堂。難免衰殘老病。任汝千般快樂。無常終是到來。惟有徑路修行。但念阿彌陀佛。一老年人。請三復斯言。切莫萬般放不下。總有一天放不下。也要放下。當知一舉世盡從忙裏老。誰人肯向死前休。一

八少年人。正好念佛。年華少壯。膂力方剛。既無老病之憂。正好發心念佛。莫道修行尙早。務宜預佈津梁。豈不聞一春日纔看楊柳綠。秋風又見菊花黃。一當知一人身難得而易失。良時易往而難追。一慎勿蹉跎歲月。虛度時光。一莫待老來方學道。孤墳多是少年人。一

九有子人。正好念佛。俗云積穀防饑。生子養老。今既生子。長大成。人家業有託。宗祧有賴。正好放下萬緣。一心念佛。求生淨土。切莫千謀百計。爲子爲孫。須知一兒孫自有兒孫福。莫爲兒孫作遠憂。一如果兒孫有福。不必先人遺產。也能白手成家。倘若兒孫不肖。任汝萬貫家財。不足以供數年揮霍。反令

造業。反害兒孫。誠爲失計。好把世間許多富貴人家。作個龜鑑。十無子人。正好念佛。世人生子既多。負擔必重。撫養教育。需款孔殷。不得不勉力經營。撐持門戶。既然無子。清閒絕累。正好自嗟薄命。夫婦同修。稱念彌陀。求生淨土。疾趣菩提。爲大悲父。則盡大地衆生。無非是佛之子。豈不快哉。舉世之人。無一人不可念佛。是念佛一法。可以普攝羣機也。

### 卅念佛可度衆生第十一

法門無量。而有大小乘之分。小乘但求自利。獨善其身。大乘志在利他。廣度羣品。或問念佛之人。厭苦求樂。願生淨土。捨此娑婆。取彼極樂。但求己利。是爲小乘。而菩薩發心廣大。捨己利他。不辭勞苦。不求安樂。涉世度生。大作佛事。不僅人中勤修萬行。乃至泥犁（地獄）苦趣。餓鬼道中。馬腹驢胎。時出時入。苦樂情亡。取捨見泯。方合大乘之道。大小比較。何啻滄海蹄涔。念佛者。何不善擇也。

答曰。念佛修行。正是最穩當大乘之行。可以報答四恩。而能濟度三有。若不發心念佛。卽欲救度衆生。祇恐於他無益。於己有損。譬如有人。不能渡水。便欲入海救人。不特不能救人。而反自取沉溺。其危險孰甚。今之徒慕大乘。便欲度生。不修念佛法門。求生淨土者。亦復如是。

大凡欲修大乘者。發心則易。不退爲難。經中有云。一魚子菴羅花。(此二譬喻因

多果少)

菩薩發大心。三事因中多。及其成就少。一舍利弗過去劫中。曾發大

心。欲修菩薩利他之行。是時天人知而試之。化一婆羅門。從途中號泣而來。菩薩問曰。爲何悲傷。答曰。吾母有病。乃告云。母病則請醫診治。何須大哭。答曰。醫已請藥。不可得。又云。有方必有藥。如何不可得。答曰。醫云。我母之病。須用發道心人之眼珠。煎湯服之。方能得救。否則必死。因求此藥不得。是以痛哭。菩薩心思。如來累劫行施。捨頭目腦髓。救度衆生。我今已發大心。當施我眼。而救其母。卽告之曰。汝不須哭。我今發大乘心。修菩薩行。當施我眼。爲汝

母作藥。婆羅門曰：感謝。菩薩卽以手將右眼取出付之。（此難行能行也）婆羅門曰：取錯了。醫云：左眼方可。右眼用不得。菩薩暗想：右眼既不可用。應當早說。何待取出方說。又想既欲利他。當勿愒惜。復將左眼取出與之。（此難捨能捨也）婆羅門接向鼻中一嗅曰：此眼臭氣如是。安可做藥。遂將此眼拋擲於地。菩薩心中動念。（此難忍而不能忍也）嘆曰：衆生難度。衆生難度。於是退失大心。此皆由未得無生法忍。雖然欲學菩薩。難行能行。難捨能捨。而難忍則不能忍。遂致六心墮落。塵劫聲聞。（小乘）由是未敢再發大乘之心。若欲修行大乘。廣度衆生。必須念佛。求生淨土。見佛聞法。得無生忍。然後普入十方塵刹。發四無量心。修六波羅密。饒益有情。同出苦輪。同生極樂。此雖先求己利者。實正欲利他也。豈彼小乘。求出三界。求證涅槃者。所可比耶。

夫念佛法門。以一心念佛。求生淨土。離苦得樂。一往觀之。似屬小乘。但爲自利。實際論之。正是大乘。可以利他。何以故。念佛往生。花開見佛。親聞佛法。證

無生忍。得身口意。三輪不思議業。普入塵刹。廣度衆生。而因中厭苦者。正欲拔衆生之苦也。卽菩薩之大悲心。因中求樂者。正欲與衆生以樂也。卽菩薩之大慈心。何得謂念佛是小乘。而非大乘耶。

三輪不思議業者。一身輪現通。一身能現無量身。或現佛身。或現菩薩身。或現辟支佛身。或現聲聞身。或現六道等身。或慈或威。或定或慧。徧入十方佛土。饒益無量有情。二口輪說法。具四無礙辯。說六波羅密。四諦十二因緣。十善五戒。世出世間一切諸法。隨機教化。拔濟衆生。三意輪鑒機。能鑒衆生根機大小。智慧淺深。易度不易度。應以何身得度。卽現何身。應以何法得度。卽說何法。如觀世音菩薩。應機示現。無作妙力。自在成就。一身不分而普現。萬機咸應以無違。是爲不思議業。得是業已。自可報答四恩。濟度三有。若不念佛求生淨土。雖發心廣大。自救尙且不了。安能救度衆生。惟有念佛修行。專心勵志。畢命爲期。內仗自心之念力。外仗彌陀之願力。會二力於一。



時收成功於一念。往生淨土。見佛聞法。證無生忍。已然後乘大願輪。回入娑婆世界。以及微塵刹土。顯六神通。行四攝法。廣度有情。同生極樂。去來自在。不被業牽。方能大作佛事。報答四恩。

一者可以報答佛恩。佛爲我故。於無量劫來。不曾棄捨於我。我昏迷時。佛則指示於我。我作業時。佛則憐愍於我。我沉淪時。佛則救拔於我。我得人身。佛則忻慰。此恩此德。莫可言喻。若肯念佛修行。自度已畢。然後度他。廣宣淨土法門。代佛宏化。普令衆生。念佛往生。橫超三界。而暢佛懷。則真報佛恩也。內典云。一假使頂戴恆沙劫。身爲牀座徧三千。若不說法度衆生。是則不名報恩者。」

二者可以報答親恩。哀哀父母。生我劬勞。所有恩德。昊天罔極。父也。養我教我。一生經營。無非爲我。愛我如掌上之珠。望我若凶年之穀。母也。十月懷胎。三年乳哺。嚙苦吐甘。移乾就濕。鞠育顧復。無微不至。若但生奉甘旨之供。死

盡喪葬之禮。均未足以爲報恩。必須念佛。求生淨土。然後還來此土。度脫親靈。永出苦輪。得生樂國。方得報答親恩。又我等自無量劫來。捨身受身。生生皆有父母。或生人中。或墮苦趣。肉眼不知。無由報答。若念佛往生。得六神通。不獨可度此生父母。且能度脫生生父母。其爲孝也。乃大。則真是報答親恩。三者可以報答師恩。父母生我。爲生身父母。師長教我。爲法身父母。若無師長。我之智識。無由開發。我之學問。無由增進。我之道德。無由成就。師恩浩大。更有過於父母。若欲報答。惟有念佛。求生西方。自度已畢。然後度他。如鳩摩羅什法師。初從槃頭達多法師。學小乘。後從蘇利耶須摩法師。學大乘。深明法性理體。自悔從前學小乘之非。因念舊師。歸爲演說大乘真理。令師得悟。而沾勝益。其師反拜爲師。羅什不敢受。師曰。我是汝小乘師。汝是我大乘師。如羅什者。可謂真真報師恩也。

四者可以報答衆生恩。或問。衆生於我。何以有恩。答曰。農人種植。而我得食。

女人紡織。而我得衣。百工技藝。所成衆器。而我得以受用。或曰。我以錢財購得。何足稱恩。答曰。雖有錢財。若非彼等勞力所成。何從購得。而受用耶。又一切衆生。或是我過去父母師長。親朋眷屬。不過改形易報。不能認識。未可謂衆生。與我全無關係。乃至耕田之牛。守夜之犬。於我亦皆有恩。應當報答。念佛求生淨土。雖則自度。實欲普度衆生。而報其恩。若以此現前。未得無漏之身。欲學菩薩。度生之行。誠非易事。譬如破船拯溺。非但不能救人。而反自遭沉溺。生淨土已。見佛聞法。證無生忍。如前所說。得身口意三輪。不思議業。用可以廣度十方。一切衆生。則真報衆生恩也。既能報答四恩。自可濟度三有。其勝益殊勳。豈語言之所能盡耶。

三有者。欲有色。有無色。有。卽欲界。色界。無色界是也。三界。何以曰三。有。因三界之內。六道衆生。隨善惡以升沉。善業則升。生天人。阿修羅。(譯非天福報不及天)三善道。而受福樂。惡業則沉墮地獄。餓鬼。畜生。三惡道。而受痛苦。若善業更

兼禪定不動之業。則生色界無色界。因善惡不動三業。起輪迴性。有因必定有果。因果不亡。故謂之曰有。若以三界九地論。則名九有。九地者。六欲天以下。名五趣雜居地。五趣衆生混雜而居。例如人間。人鬼禽畜同居故。初禪天。名離生喜樂地。二禪天。名定生喜樂地。三禪天。名離喜妙樂地。四禪天。名捨念清淨地。併四空天。空無邊處地。識無邊處地。無所有處地。非想非非想處地。廣名二十五有。都是有因有果。隨業受報。念佛之人。自度已畢。發心度他。乘願利生。豎窮三界。如金剛經所云。一若卵生。若胎生。若濕生。若化生。若有色。若無色。若有想。若無想。若非有想非無想。我皆令入無餘涅槃。而滅度之。一。是謂濟度三有。故曰念佛可度衆生。

卅念佛得成佛道第十二

或問、念佛本極易之事。而成佛爲甚難之事。佛道長遠。經中所云。必經三大阿僧祇劫。勤修六度萬行。方可得成。何以念佛卽得成佛。答曰、修行法門。頓

漸不同。漸則三祇煉行。百劫修因。方成佛道。頓則不歷僧祇。可獲法身。未可一概論也。

念佛乃是橫超生死。疾趣菩提。圓頓法門也。只怕大家不肯念佛。不怕不得成佛。如果一生精進不懈。自然佛果可期。二祖長安光明善導大師云。一願一切人等。善自思惟。行住坐臥。必須厲心克己。晝夜莫廢。畢命爲期。前念命終。後念卽生。永劫受無爲之樂。乃至成佛。豈不快哉。一善導大師。一生專修念佛法門。念一佛。口放一光。念百佛。千佛。其光亦然。如上開示之言。自應深信。加以切願實行也。

又文殊菩薩。告蓮宗四祖。五會法照大師曰。一諸修行門。無過念佛。一四祖至五臺山。大聖竹林寺。親見文殊普賢二大士。分坐左右。同舒金臂。摩四祖頂曰。一汝以念佛故。不久證無上正等菩提。若善男女等。願疾成佛者。無過念佛。則能速證無上菩提。一觀此二大士之言。分明指示念佛。可以成

佛。何疑之有。

念佛之人。而得諸佛慈悲之所護念。彌陀願力之所攝持。命終往生。徑登不退。任運進修。直至成佛。彌陀經云。一衆生生者。皆是阿鞞跋致。其中多有一生補處。（候補成佛之位）其數甚多。一觀一生補處之句。一經往生。卽是最後身。豈不是一生卽得成佛耶。此乃約事而言。若約理說。念佛功深。無念而念。念而無念。心佛圓融。自他不二。一念相應。一念佛。念念相應。念念佛。證惟心淨土。見自性彌陀。不待往生。卽成佛道。其圓頓爲何如耶。

或曰。念佛往生。其事確否。答曰。信願行三種資糧具足。往生必矣。永明大師云。一無禪有淨土。萬修萬人去。一淨土往生集。出家在家之衆。念佛往生者。不可勝數。臨終皆有證驗。或預知時至。或端坐而逝。或體出異香。或天樂鳴空。豈虛語哉。宋時。湖南潭州。黃打鐵。以打鐵爲業。一家四口。全靠手藝。以度生活。一日不作。便難度日。常生怨歎。前世不修。今生受苦。常思修行。奈不知

如何修法。又無閒空工夫可修。一日見一僧。從其店前而過。遂請入店奉茶。請教修行之法。要求指示一種。可以作工。又可修行之法。僧曰。只怕汝不肯相信。黃曰。大師明教。那有不信之理。僧曰。汝欲離苦得樂。娑婆世界。無有真樂。惟有西方。阿彌陀佛國土。無有衆苦。但受諸樂。欲生彼國。只要一心稱念南無阿彌陀佛名號。念念不斷。臨命終時。蒙佛接引。即得往生彼國。我教汝手掣風箱時。念一句南無阿彌陀佛。推進時。亦念一句南無阿彌陀佛。念到鐵紅取出。打一槌。念一句。槌槌如是。不打鐵也念。未睡着也念。若能如是念去。包汝臨終往生西方。極樂世界。黃打鐵聞教。十分歡喜。極端相信。既可修行。又可工作。即依教奉行。人皆嗤其愚。打鐵本來辛苦。再加念佛。豈不是苦上加苦。黃打鐵則不然。念之數日。愈加深信。謂此念佛法門。真實有益。我平日在火爐邊站着。有炎熱的苦。打起鐵來。有辛勞的苦。今念起佛來。完全不曉得炎熱。也不曉得辛勞。由是更加精進。經歷三年。有一日自知命終時。

至。遂卽剃頭沐浴更衣。告其妻曰。我今日回家去了。妻曰。汝何處還有家。答曰。此非我家。我家在西方。於是再站鐵爐邊煨鐵。照常念佛。鐵紅取出。乃說偈曰。一釘釘鑄鑄。久煉成鋼。太平將近。我往西方。一念一聲南無阿彌陀佛。舉槌打鐵一下。遂卽立化。身出異香。天樂鳴空。此彌陀接引往生之瑞相也。衆皆聞香。無不驚歎。因此潭州之人。多皆念佛。迄今尙盛。古今多少念佛往生。不可不信。

又問。十方世界。無量衆生念佛。如果皆得往生。則極樂世界。如何容納得了。答曰。滄海納百川而不溢。尺鏡含萬象而有餘。世間之物。尙且如是。何況彌陀廣大願力。及不思議力。成就無邊莊嚴之佛土。安有不能容受往生之衆耶。

又曰。天衣懷禪師論蓮宗言。生則決定生。去則實不去。子言實有往生淨土。豈不與古人相違耶。答曰。不違。此乃古德悟實相念佛往生之旨。真俗不乖。



理事無礙。汝但誦其語。未解其義。上句生則決定。生是俗諦。事法界。下句去則實不去。是真諦。理法界。卽是生唯心淨土。自他不隔於毫端。安有去來之相可得。省庵大師發菩提心。念佛往生。其偈曰「身在花中佛現前。佛光來照紫金蓮。身隨諸佛往生去。無去無來事宛然。」往生一事。不必懷疑。若稍有疑慮。卽信不深。而願不切也。

又唯心淨土。並不是沒有西方。極樂世界。清淨莊嚴之佛土。乃是指真心體徧十方。量周沙界。卽西方極樂淨土。亦不出自心之外。故曰唯心淨土。念佛之人。慎勿錯解唯心之義。若以唯心二字。卽謂沒有西方淨土。則阿彌陀經。釋迦呼舍利弗。而告之曰。從是西方。過十萬億佛土。有世界名曰極樂。其土有佛。號阿彌陀。此豈是欺人之言耶。佛爲大聖人。決無捏詞欺人之事。又不可以不見西方極樂世界。遂謂無有極樂。如世人未至西歐者。安可說實無西歐耶。念佛必定成佛。法華經云。一若人散亂心。入於塔廟中。一稱南無佛。

皆共成佛道。一散心之人。一稱佛名。尙能成佛。何況終身專心持念。精進不懈。豈有不成佛之理耶。

楞嚴經大勢至菩薩圓通章云。一憶佛念佛。現前當來必定見佛。去佛不遠。一觀去佛不遠句。明示念佛即可成佛之意。何謂現前見佛。或念佛專切之時。常夢中見佛。余曾夢見極樂世界。彌陀慈尊。併聞說法。勅我當自行化他。修持淨業。故從三十六歲後。禪淨雙修。每當傳授三皈依。或講經法會。力勸大家發心念佛。求生淨土。告曰。修行以念佛爲穩當。應以持名念佛爲正行。廣修衆善爲助行。正助合行。如船帆順風。更加櫂棹之功。往生淨土。品位必高。

或三昧功成。定中見佛。如蓮宗初祖。慧遠大師。在廬山結集蓮社。專修念佛法門。三十年。跡不入俗。澄心入定。三觀聖相。沈厚不言。唐義熙十二年七月晦夕。於般若臺方從定起。見阿彌陀佛。身滿虛空。圓光之中。有諸化佛。觀音

勢至左右侍立。又見水流光明。分十四支。回注上下。演說苦空無常無我之音。佛告言。我以本願力故。來安慰汝。汝後七日。當生我國。又見社中先化者。佛陀耶舍。慧持。慧永。劉遺民等。皆在彌陀之側。曰。師早發心。何來之晚也。此皆定中見佛之明證。後於八月七日。集衆告別。謂弟子法淨。慧寶曰。吾始居此。十一年中。三覩聖相。今復再見。吾生淨土必矣。卽自製遺誡。端坐念佛而寂。異香滿室。天樂鳴空。弟子等奉全身。塔於廬山西嶺。何謂當來見佛。若念佛功成。往生時至。臨命終時。則見阿彌陀佛。現身接引。此當來見佛也。又託質寶蓮花。開見佛。面禮金容。親蒙授記。忍證無生。位居補處。不僅可以常見於佛。亦卽得成爲佛也。有此圓頓殊勝法門。可以橫截生死。欲流疾趣菩提覺岸。凡欲離苦得樂。超凡成聖者。自當以持名念佛一法。爲唯一無上法門。終身力行也。

集白雲法師撰望江南淨土詞十二首

西方好。隨念卽超羣。一點靈光隨落日。萬端塵事付浮雲。人世自紛紛。  
凝望處。決定去棲神。金地經行光裏步。玉樓宴坐定中身。方好任天真。  
西方好。瓊樹聳高空。彌覆七重珠寶網。莊嚴百億妙華宮。宮裏眾天童。  
金地上。欄楯繞重重。華雨飄飄香散漫。樂音寥亮鼓清風。聞者樂無窮。  
西方好。七寶瑩成池。四色好花敷菡萏。八功德水泛清漪。除渴又除饑。  
池岸上。樓殿勢飛聳。碧玉雕欄填瑪瑙。黃金危棟閒玻瓈。隨處發光輝。  
西方好。羣鳥發音聲。華下和鳴歌六度。光中哀雅讚三乘。聞者悟無生。  
三惡道。猶自不知名。皆是佛慈親變化。欲宣法語警迷情。心地頓圓明。  
西方好。清旦供尤佳。縹緲仙雲隨寶仗。輕盈衣被貯天花。十萬去非賒。  
諸佛土。隨念徧河沙。蓮掌撫摩親授記。潮音清妙響傾伽。時至卽還家。  
西方好。我佛大慈悲。但具三心圓十念。卽登九品越三祇。神力不思議。

臨報盡。接引定無疑。普願眾生同繫念。金臺天樂共迎時。彈指到蓮池。  
娑婆苦。長劫受輪迴。不斷苦因離火宅。祇隨業報入胞胎。辜負這靈台。  
朝又暮。寒暑急相催。一箇幻身能幾日。百般機巧袞塵埃。何得出頭來。  
娑婆苦。身世一浮萍。蚊蚋睫中爭小利。蝸牛角上竊虛名。一點氣難平。  
人我盛。日夜長無明。地獄爭頭成隊入。西方無箇肯修行。空死復空生。  
娑婆苦。情念驟如風。六賊村中無暫息。四蛇篋內更相攻。誰是主人翁。  
無慧力。愛網轉關籠。一向四楞但擔地。不思兩脚無梢空。前路更忽忽。  
娑婆苦。生老病無常。九竅腥臊流穢汗。一包膿血貯皮囊。爭弱又爭強。  
隨妄想。耽欲更荒唐。念佛看經云著相。破齋毀戒却無妨。祇恐有閻王。  
娑婆苦。終日走塵寰。不覺年光隨逝水。那堪白髮換朱顏。六趣任循環。  
今與古。誰肯死前閑。危脆利名纔入手。虛華財色便追攀。榮辱片時間。  
娑婆苦。光景急如流。寵辱悲歡何日了。是非人我幾時休。生死路悠悠。  
三界裏。水面一浮漚。縱使英雄功蓋世。祇留白骨掩荒邱。何似早迴頭。

# 勸修念佛法門 功德主名錄

委印文號：1 0 1 2 1 1

一五、六〇〇元：三寶弟子家族。

以上共計新台幣：一五、六〇〇元，恭印一、二〇〇本。

回向：天下和順，日月清明，風雨以時，災厲不起，國豐民安，兵戈無用，

崇德興仁，務修禮讓，國無盜賊，無有怨枉，強不凌弱，各得其所。

祝願法界一切有情，所有六道四生，宿世冤親，現世業債，咸憑法力，悉得解脫。

祝願現生者增福延壽，發菩提心，常隨佛學，勤修精進，利濟群生。

祝願已故者往生淨土，同出苦輪，共登覺岸。

附記：本會接受善信委託，代印經書、佛像，其必要之費用，均經本會審慎評估；

若有結餘，均續作本會之印（購）經書及運費，為施主廣積陰德，歡迎十方大德善加利用。

普為出資及讀誦受持  
輾轉流通者回向偈曰

願以此功德  
消除宿現業  
增長諸福慧  
圓成勝善根  
所有刀兵劫  
及與饑饉等  
悉皆盡滅除  
人各習禮讓  
讀誦受持人  
輾轉流通者  
現眷咸安樂  
先亡獲超昇  
風雨常調順  
人民悉康寧  
法界諸含識  
同證無上道



佛曆二五五六年／西元二〇一二年五月

恭印：一二〇〇本

流水號：10448  
書號：07860-32

## 勸修念佛法門

發行人：林國營

出版者：財團法人佛陀教育基金會

地址：100 台北市杭州南路一段五十五號十一樓

網址：<http://www.budaedu.org>

E-mail：[budaedu@budaedu.org](mailto:budaedu@budaedu.org)

電話：(011) 2395-1198

劃撥戶名：財團法人佛陀教育基金會

傳真：(011) 2399-1341  
郵局劃撥帳號：〇七六九四九九

銀行名稱：台北富邦銀行東門分行（請於電匯或轉帳後告知本會用途）

銀行帳號：五八〇二一〇一九三三三

本會經書免費結緣之請取方式如下：

(一) 親臨本會三樓講堂。(二) 利用傳真：(02) 23965959

(三) 撥打電話：(02) 23951198 分機：11、12

(四) 網址：<http://www.budaedu.org/books/>。(五) 寫信指定：本會法寶流通股。

為提高服務效率，請您嚴謹考量，慎選所需經書；儘量少用電話，多利用文字方式請取，並請詳寫經書名稱、冊數及收件人姓名、地址、電話、郵遞區號，以減少本會之處理時間；若大量申請，請註明用途，且避免姓名、地址等文字上書寫之錯誤。

◎ 本會經書，歡迎翻印（請勿增刪），贈送流通，功德無量。

◎ 本會交通——

※ 捷運：善導寺站 5 號出口，至杭州南路右轉，過兩個紅綠燈。

※ 公車站牌：審計部站 → 212、299、232、205、276、605、257、262

台北商業技術學院 → 253、297、237 仁愛路二段 → 222、297

開南商工 → 208、295、297、15、22、671

行政院新聞局出版事業登記證局版臺業字第三八六九號

